

ANTITHESE DE LA CENE DE NOSTRE SEIGNEVR IESVS CHRIST,

ET
DE LA CENE CALVINIENE
AVEC SON FORMVLAIRE.

Pour seruir de réponse aux railleries satyri-
ques d'un Parasite masqué de la Religion
Pretendue Reformée, contre le nom de
MESSE.

Par Messire PHILIPPES CODVRC, Conseiller
du Roy en ses Conseils d'Estat & Privé.



N. A PARIS, M.

De l'Imprimerie d'EDME MARTIN, rue
S. Iacques, au Soleil d'or.

M. DC. LVI.

Donny A. M. de Magalhães

A NOSSEIGNEURS,
NOSSEIGNEURS DES
*Trois Estats de la Prouince
du Languedoc.*



NOSSEIGNEURS,

*Si la volonté des morts donne
des loix aux viuanes, me trou-
uant fortuitement successeur de la Bibliothe-
que de feu Monsieur Codurc; ie me vois
obligé d'executer son dessein, & poussé d'un
zele plus ardent que le sien; ie vous offre,
consacre & dedie, ces deux petits traittez
qui sont les derniers ouurages de sa vie;
l'un desquels est le traité de la Colombe de
Noé qui vient à vous (NOSSEIGNEURS)
avec le signe de la Croix, comme sur une
Assemblée conuquée par le S. Esprit, ce
Symbole Mystereux de Paix & de Grace,
force les heretiques d'aduoir la vertu Mj-*

si-
g-
ne de ce signe par lequel toutes choses ont
esté faites, & les preuues en sont si fortes,
que l'on ne les peut détruire, puis qu'elles
sont tirées de la sainte Esriture & de la
pratique ordinaire, de toutes les saintes
actions des Apostres, cette arme victorieuse,
fortifie ceux qui la portent, & donne frayeur
aux ennemis visibles & inuisibles, elle éclai-
re nos sens, anime nos esprits, guide nos
pensées, & sanctifie toutes nos actions & si
les heretiques n'ont pas l'usage de ce signe
si puissant aussi ne font-ils point de miracles
car leurs œuvres sont mortes à faute de Foy;
Et S. Pierre preschant donne preue de cet-
te verité, disant à ceux qui ne l'entendoient
pas, qu'ils n'estoient pas baptisez au nom du
Pere, & du Fils & du S. Esprit. Et pour
ce ils ne le pouuoient pas entendre, de telle
sorte que quiconque n'a pas cette marque
Chrestienne, ne peut estre qu'Anatheme.
L'autre traitté est l'Antithese de la Messe
avec la Cene de Caluin, contenant vne res-
ponse indiciense & modeste à vn imperti-

neut libelle fait par vn Religieux contre le saint Sacrifice de l'Autel, ou toutes les veritez Chrestiennes sont si solidement establies, prouuez par les saints Euangiles & par la doctrine des saints Peres, que l'on n'en peut aucunement douter, ces deux flambeaux de la Foy, éclaireront les aveugles obstinez, & dissiperont les tenebres de leur erreur ; Si l'ombre de Monsieur Cadurc paroist encore par ses ouvrages devant vous (NOSSEIGNEURS,) c'est pour vous donner des marques infailibles de sa veritable Conuerſion, & de la pureté & rectitude de sa vie ; mais quoy que ces deux traittez soyent fondez & appuyez sur la Foy & sur la Creance du Pere, du Fils & du saint Esprit, ils ont encore besoin de vostre protection (NOSSEIGNEURS) pour se defendre contre la malice des enuieux, & la mesdisance des ignorans ; ce que l'on peut iustement attendre de vostre Autorité. Je souhaitteroie d'auoir quelque autre chose digne de vostre Auguste Assemblée pour vous

l'offrir : mais ie suis vn pauvre petit Buij-
son , que l'orage & la tempeste ont battu &
despoüillé , & que Dieu a conserué ainsi
qu'il conserua le Buijson ardent entier au
milieu des feux & des flames , il ne me reste
rien que la parolle avec laquelle ie viens
vous offrir tout ce que peut ma basesse , &
pour vous assurer par mes vœux que ie se-
ray toujours avec vn tres-profond respect de
votre Auguste, Sacrée, Noble & prudente
Assemblée.

VOSSEIGNEURS,

Le tres-humble , tres-obeissant ,
& tres-obligé Seruiteur ,

P. D. BUISSON.



ANTITHESE DE LA MESSE, ET DE LA CENE DE CALVIN.

CHAPITRE I.

*Des railleries & des blasphemes d'un
Parasite masqué, sur le nom de
la Messe.*



E que le Prophete Ieremie disoit des Juifs de son temps au chap. 9. Qu'ils ne faisoient que tromper, qu'affronter ; Qu'ils ne disoient point de veritez : Qu'ils auoient

A ij

4 *Antithese de la Messe,*

façonné leur langue à mentir: Qu'ils se fatigassent pour malfaire: Qu'ils s'étoient posez au milieu de la fraude, & que par fraude ils refusoient de connoître Dieu, est vn vray portrait des Heretiques de ce siecle, qui sous pretexte de reformer l'Eglise Chrestienne, l'ont déchirée, & la déchirent tant qu'ils peuvent par leurs blasphemes contre la saine doctrine que les Apostres ont enseignée de viue voix, & par écrit: contre le culte saint & religieux qu'elle tient des Apostres, qu'elle a obserué, qu'elle obserue & observera fidelement iusqu'à la fin du monde, par le commandement de Iesus Christ: Faites cecy pour mon memorial: suiuant l'instruction de l'Apostre, Vous annoncez la mort du Seigneur iusqu'à ce qu'il vienne. Ils n'ont pas eu horreur de dire, que la Messe est le Dieu Mahuzim del'Antechrist, le soutien, l'appuy, le donjon, le fort & la citadelle de l'Antechrist: Que c'est le principal chef de l'horrible abomination, & vne Helene avec laquelle grands & petits paillardent: Et de vomir en detesta-

de la Cene de Caluin. 5

tion de la pieté Chrestienne toutes les execrations qu'ils ont sceu controuuer. Ils persistent encore en la mesme fureur, quoy qu'on leur ait souuent remonstré & prouué que c'est vn acte sacré & religieux du sacrifice de nostre Seigneur Iesus Christ, qu'il appelle son corps rompu, & son sang répandu, que l'Eglise celebre par son commandement: par lequel elle a annoncé, elle annonce, & annoncera la mort de son Seigneur & de son Redempteur iusqu'à sa venue, offrant à Dieu le sacré saint memorial du grand sacrifice propitiatoire pour les pechez de tous les hommes, avec lequel & par lequel elle s'offre elle-mesme & ses prieres comme l'encens, formant cette colonne ou palme de fumée qui monte de la terre au ciel, dont parle Salomon en son Cantique. Le dernier traité qui s'est fait pour leur instruction, premierement en Latin, imprimé l'an 1645. a pour titre, *De Missæ sacrificio, deque corporis & sanguinis Christi in Eucharistia vera presentia. Authore Philippo Codurco.* mis en François & imprimé dans la

6 *Antithese de la Messe,*

mesme année; depuis encore reimprimé, sans qu'on y ait répondu ny contredit. Mais vn Parasite masqué qui l'a leu en Latin, & qui l'a pû entendre s'il en eust voulu profiter, au lieu de reconnoistre la verité, & donner gloire à Dieu, s'est fatigué pour abuser & pour tromper ceux qu'il appelle ses chers amis, les détourner de la lecture de ce traité par vn écrit à la main dont il a fait faire quelques copies, plein d'impostures & de railleries sur le nom de la Messe, dissimulant les fondemens solides de cette assercion Catholique.

Qu'en la sainte Eucharistie & Cene du Seigneur que nous appellons la Messe, il faut offrir à Dieu le pain & le vin avec actions de grace, pour estre consacrez & faits le corps & le sang de Iesus-Christ, selon qu'il le prononce; & la consecration faite, il faut offrir à Dieu le corps & le sang du Seigneur.

Luther & Calvin, & leurs sectaires soustiennent le contraire, qu'il ne faut

offrir ni l'un ni l'autre, & blasphemement contre la doctrine & la liturgie Catholiques. Voilà l'estat de la controuersé entre les Catholiques & les Heretiques de ce temps. C'est ce qu'il faut entendre par le sacrifice de la Messe; en laquelle on fait ce que Iesus Christ a commandé de faire pour son memorial, de quoy nous ne traiterons pas icy, puisque le Parasite n'y a osé toucher. Nous renuoyons le Lecteur au susdit traité, qui est tres-clair, tres-exacte, & tres-solide, auquel tout bon Chrestien & deuotieux trouuera sa satisfaction & son edification. Ce Parasite s'est contenté d'égratigner le nom de la Messe, par ce petit écrit qu'il a laissé au Vigan plein de bouffonnerie & de raillerie, auquel nous répondrons selon le precepte du Sage: Répon au fol selon sa folie, afin qu'il ne s'estime sage. Et pratiquerons aussi le precepte du même Salomon, Ne répon pas au fol en suiuant sa folie, de peur de luy ressembler.

En sa premiere periode il pose que l'Eglise Romaine fait parade du mot de Messe, la prenant comme vne liurée de

8 *Antithese de la Messc,*

sa Religion, & qu'elle combat pour cela comme pour le tout. Réponse. Il n'est pas vray que l'Eglise Catholique Apostolique Romaine face parade de mots. Au contraire elle condamne avec saint Paul les logomachies, & les disputes de mots, & dit avec le S. Apostre que c'est l'Heretique lequel ἐπεροδιδασχάλει ἡ μὴ προσέρχεται ὑπαίνουσι λόγοις τοῖς τῷ κυρίου ἡμῶν Ἰησοῦ Χριστοῦ ἡ τῇ χατ' ὡς εἶναι διδασχάλια. πετύφωται μηδὲν ἐπισάμνθ', ἀλλὰ νοσῶν παρὶ ζητήσεως ἡ λογομαχίας ἐξ ὧν γίνεται φθόνος εἰς, &c. 1. Tim. 6. c'est à dire, *Qui enseigne autrement & autre chose que les Apostres n'ont enseigné, qui ne se tient point aux saines paroles de nostre Seigneur Iesus Christ, & à la doctrine de pieté, il est enflé de presumption & ne sçait rien, & a une maladie d'esprit après les questions & les disputes des mots, d'où ne vient qu'enuie, que noise, &c.* Elle defend avec le mesme Apostre 2. Tim. 2. λογομαχεῖν. C. de débattre pour les mots. Ce sont les Heretiques Preten-

dus Reformez qui font la guerre & qui combattent pour des mots. Par exemple, ils disputent obstinément sur la doctrine de la iustification, & en font vne des pieces fondamentales de leur schisme. On leur a monsté que ce n'est qu'une logomachie: car ils sont contraincts d'auouer la doctrine Catholique, à sçauoir, que le S. Esprit engendre en nous par la foy vne sainteté interieure, vne nouvelle vie, faisant mourir le peché, regenerant l'ame fidele. Et cette sainteté & iustice interne est suivie d'une vie sainte & iuste, & des bonnes œuvres. C'est ce que S. Paul & S. Iacques entendent par la iustification, & par estre iustifié. Iamais ils ne l'ont autrement entendu. Mais les Protestans & Puritains ou Pretendus Reformez, veulent que la iustification ne soit autre chose que la seule absolution ou pardon des pechez, sans y comprendre la sainteté & la iustice infuse par la foy, accompagnée de la justice & sainteté des bonnes œuvres. Et ne pouuant accorder saint Iacques avec la fausse interpretation qu'ils donnent à S.

Paul, ils ont repudié l'Epistre de S. Iacques, & disent que c'est vne Epistre de paille. C'est encore par vne logomachie qu'ils reiettent cinq Sacremens, la Confirmation, la Penitence, l'Ordre, le Mariage, l'Extreme-Onction. Ils les reconnoissent bien pour des actes saints & religieux, mais ils nient que ce soient des Sacremens, & maintiennent comme des accariastres qu'il n'y en a que deux, le Baptisme & la sainte Cene; qui toutefois ne sont iamais appelez Sacremens ni Mysteres en la sainte Ecriture. C'est vn terme de l'Eglise qui qualifie de ce nom general les saintes & religieuses actions ordonnées par les Apostres, pratiquées en l'Eglise par la Confirmation, la Penitence, les Ordres, le Mariage, l'Onction des malades, qu'elle nomme Sacremens, comme le Baptisme & la sainte Eucharistie, quoy que de diuers genres. Et Messieurs les Pretendus leur déniaient le nom de Sacrement, les reiettent, pour quereler avec les Catholiques par vne pure logomachie. C'est encore vne pure logomachie d'estriuer sur les mots de Messe

& de Cene, & d'en faire vn caractere pour reconnoistre la bonté ou la mauuaitié, l'antiquité ou la nouveauté de la Doctrine & de l'Eglise, & de vouloir inferer, que parceque l'Eglise Catholique Romaine employe le mot de Messe pour signifier le principal acte de son culte religieux, qu'elle, ni la Religion qu'elle observe, & qu'elle entend par ce mot de Messe, n'est que depuis l'usage de ce mot là. C'est comme si on disoit que la doctrine de la sainte & bien-heureuse Trinité, n'est point auant l'usage du terme de Trinité. Ni l'identité d'essence de la personne du Fils avec celle du Pere n'est point deuant qu'on employast ces mots pour la signifier $\delta\mu\omicron\upsilon\sigma\iota\varsigma\ \tau\tilde{\omega}\ \pi\alpha\tau\epsilon\rho\iota$: Et qu'il n'y a point de remission de pechez deuant que les Latinseussent prononcé, *Remissam peccatorum*. Je n'ay iamais rien oüy de plus impertinent que ce raisonnement si déraisonnable. Autant impertinent est cettuy-cy, de vouloir conclure, que c'est vne bonne marque & vn caractere d'antiquité, & vnauantage pour monstrier qu'on est la vraye Eglise & de

la vraye Religion, de se dire du Prêche & de la Cene; parce que la Prêche & la Cene sont des vieux mots, Augustes & Venerables, comme parle cet histrion, par lesquels on se distingue d'auec l'Eglise Romaine. Nous traiterons de l'antiquité de ces mots Prêche & Cene, de l'antiquité de la doctrine & du culte de l'Eglise Pretenduë Reformée, après que nous aurons répondu à ses blasphemes contre la Messe, Qu'il dit estre vne vagabonde; Qu'on ne sçait pas son origine; Qu'elle est du monde, toute terrestre, toute du siecle : Qu'on ne sçait pas de quel país elle est ni d'où elle est venue; Qu'on n'en est pas d'accord. C'est ainsi qu'il blaspheme du S. Sacrement, & du Culte religieux de l'Eglise Romaine, à cause du nom de Messe : Que les vns, dit-il, font venir de Grece, disans que c'est vn mot Grec; d'autres disans que c'est vn mot Hebreu, & la pluspart que c'est vn mot Latin: Qu'on disoit anciennement *Missä* pour *Missio*, comme *remissa* pour *remissio*. Nous ne traiterons pas du sacrifice ni de l'action signifiée

par ce nom là, renuoyant le Lecteur au traité mentionné, qui pose l'estat de la controuerse comme il faut, & qui prouue la verité de l'assertion de l'Eglise Romaine contre la negatiue des Heretiques, auquel traité ni Protestans, ni Puritains, Lutheriens & Calvinistes, ni Satan mesme nescouroient répondre qu'en blasphemant, ou boufonnant, & en rail-
lant. Parlons du mot *Missa*, & de son origine.

CHAPITRE II.

Du mot de Messe, Et de son origine.



L n'est pas vray qu'aucun homme docte ait iamais dit que le mot *Missa* fust Grec. Ce que l'Eglise Latine entend par le mot *Missa*, les Grecs l'ont appellé *σῶμα καὶ αἷμα τῷ Χριστοῦ, αἰάμνησις τῆς θυσίας καὶ τῷ θανάτῳ τῷ κυρίου, κυριακὸν δεῖπνον, χερὴ ἀφθίκη, τραπέζα κυρίου, ἱερουργία, ἡ λειτουργία, εὐχαριστία, σύναξις, τὰ μυστήρια, τελετὴ τε*

λεπτόν. Voilà dix noms Grecs tirez de la sainte Ecriture, des Euangiles, & des Epistres de saint Paul, & des anciens Peres Grecs, pour signifier en cette langue le saint Sacrement de l'Autel. Mais *Missa* n'est point Grec, ni ne le fut iamais Il y en a qui disent qu'il est Hebreu, & que c'est le mot employé au Deuteron. 16. γ. 18. que la Vulgate Latine interprete *Oblationem*, & Vatable aussi. De mesme Tremellius & Iunius. Ceux de Geneue, offrande volontaire. Castalion *Donarium*, Melancthon & Calvin tous ennemis qu'ils sont du sacrifice de la Messe, accordent qu'en Hebreu le mot *Missa* signifie oblation. Et pourquoy ne pourroit-on pas dire que comme ces termes de Pasque, & Messie, & Hosanna, & autres qui sont Hebreux, sont venus parmy nous des Apostres, qui les ont retenus, nous enseignant en nostre langue de vive voix, & par écrit les mysteres de la foy: de mesme le mot de *Missa*, qui est pur Hebreu, & qui signifie Oblation, qui est vn terme fort remarquable, qui ne se trouue qu'en ce lieu là מִסָּה נִדְבָתָא *Missa*
ת

nidbath pour signifier vne sainte Oblation, a esté gardé & employé par les SS. Apostres, pour signifier ce sacré saint mystere de la Religion Chrestienne, qui est la verité dont toutes les ceremonies de la Loy n'ont esté que les ombres & les figures? Mais passe. Accordons leur, & le farceur Sophiste y donne son suffrage, que *Missa* est Latin, & se dit pour *missio*, comme *remissa* pour *remissio*. Et qu'anciennement il y auoit la Messe ou mission, ou congé des Catechumenes deuant la Communion: & la Messe ou mission, ou congé des Communians après la Liturgie. D'où est venu qu'on appelle *Missa* ce qui se fait entre l'une & l'autre mission. C'est en ce sens que saint Ambroise le prend, quand il dit au 5. liure de ses Epistres en l'Epistre 33. qu'un iour de Dimanche après la lecture & le sermon, ayant congedié les Catechumenes on luy vint dire pour certain qu'il y auoit de la rumeur, *Ego tamen mansi in munere, Missam facere cepi. Dum offero &c.* Où sans difficulté *Missa* signifie la Liturgie, & l'Office que nous entendons & obser-

uons en l'Eglise; & n'est pas necessaire qu'aucun se mesle de faire vne glose sur cette phrase de saint Ambroise qui s'interprete d'elle-mesme par le lieu où elle est employée. Mais vous auez au quatriéme tome des œuvres de saint Ambroise deux prieres, dont le titre est, *Precatio preparans ad Missam*. 1. 2. En la premiere il demande à Dieu, *Propter magnam clementiam tuam concede mihi hodie & semper Missarum solemnia puro corde & pure mente celebrare.*

Mais si le mot *Missâ* est Latin; si son etymologie & son origine est de la langue Latine, ce n'est pas à dire que l'acte religieux qu'on a ainsi nommé prenne son origine du peuple à qui la langue Latine est familiere & naturelle. Car le Saint Sacrement que nostre Seigneur Iesus Christ a institué, qu'il appelle son corps rompu & son sang répandu, son memorial: que les Apostres ont administré, ont recommandé à tous tant Iuifs, que Grecs & Gentils, est diuersement nommé selon la langue naturelle à chaque peuple. Les Ethiopiens
tant

tant Asiatiques qu'Africains l'appellent d'un nom qui vient de l'Hebreu, *Corban*, qui signifie oblation ou sacrifice. En Hebreu on peut dire *Missa nidbath* Deut. 16. *minha badascba* Leuit. 23. 16. *minha tahora* Malach. *zeba kippurim*, *zeba tahora*, *hatsereith*, dont il est parlé au Leuit. 23. Auquel mot le Grec *συναξις*, *synaxe*, correspond. *guphath nischbara meschia vedamo scapuc. ascharathmeschia*, *mischte meschia*, *schulhan Adonai*, *zebah zebahim. zebah haggadol*. Mais les Latins ne l'ont pas seulement appelé *Missa*, ils le nomment aussi *Cæna Domini*. Saint Cyprien en a fait un traité sous ce nom là : où il la représente, & n'en dit rien qui ne luy conuienne ; la décrivant particulièrement sous les noms généraux de *Sacramenta*, *sacra mysteria*, *Christi commemoratio*, *Dominica mensa*. Et en l'Épître 63. qu'il adresse à Cæcilius, il l'appelle dix ou douze fois *sacrificium Christi* ; & absolument *Dominicum*, où il faut sous-entendre *epulum*, ou *conuiuium*. Saint Ambroise l'appelle aussi *diuinum* & *cæleste sacrificium*, *sacrosanctum mysterium corporis* &

sanguinis Dominici, & conuiuium cæleste;
en ses liures *De iis qui mysteriis initiantur,*
de Sacramentis; & en la premiere Oraison
pour se preparer à la Messe. D'où les ad-
uersaires peuuent reconnoistre l'ancien-
neté de la Liturgie Latine, dont on vſe
aujourd'huy en l'Eglise Romaine; car el-
le se trouue presque toute dedans ces li-
tres-là. Voilà donc les titres qui ont esté
donnez, & qu'il faut donner à la Messe,
aux trois langues que Pilate escriuit le
titre de la Croix de Iesus par la prouiden-
ce de Dieu. On les peut expliquer & les
mettre en la langue naturelle de chaque
peuple pour les luy faire entendre. On
prouuera aux aduersaires de viue voix &
par écrit quand ils voudront, que tous
ces eloges sont propres à la Messe, & qu'
ils ont blasphemé & blasphement enco-
re contre la Messe. Que ce Parasite mas-
qué qui fait le suffisant, qui n'a pas osé
souscrire à sa raillerie, les considere bien:
il verra qu'il a mal parlé de dire que la
Messe expose derechef Iesus Christ en
opprobre. Ce qui est falsissime. Car c'est
à l'honneur de la Croix qu'elle est insti-

tuée, & qu'elle se celebre. Qu'il lise attentivement le liure du sacrifice de la Messe, & il verra qu'il n'y a rien de si sacré sous le Ciel, rien de plus sacré dans le Ciel que la Messe, ni rien de plus profane au monde que la Cene de Calvin: de laquelle les Lutheriens, qui font la plus grande partie des Pretendus Reformateurs & Reformez, se moquent avec raison, l'appellant Cene deambulatoire. Et les mesmes Lutheriens encore ne parlent pas tous de la Messe avec execration: Car voicy ce que Philippe Melancthon le plus sçauant de tous, en a écrit au liure qu'il a intitulé, *Corpus doctrine Christiana, &c.* Après l'abregé de leur Confession de foy présentée à l'Empereur Charles Quint, traitant des abus, *in externis ritibus*, il dit tout au commencement, *Falsò accusantur Ecclesie nostra quòd Missam aboleant. Retinetur enim Missa apud nos, & summâ reuerentiâ celebratur, &c.* Et en l'Apologie qu'il a faite de leur Confession, parlant encore de la Messe il dit, *Initio hoc iterum præfandum est, nos non abolere Missam, sed religiosè retinere, ac*

defendere. Fiunt enim apud nos Missa singulis Dominicis, & aliis festis, &c. Et après traitant du nom de Messe il dit, que les Grecs l'appellent Liturgie, & Synaxe, & en rend la raison : Et que le mot *Missâ* est Hebreu, & signifie oblation, & allegue le 16. chap. du Deut. Toute sa dispute est, si la Messe est vn sacrifice propitiatoire pour les pechez des viuans & des morts. C'est ce qu'il nie absolument contre la foy de l'Eglise Catholique Apostolique Romaine, qui tient que la Messe est le sacrifice de nostre Seigneur Iesus Christ, présenté à Dieu son pere pour les viuans & pour les morts. Et ce petit Farceur Calvinien l'a bien dit. C'est à quoy il se deuoit prendre, sans s'amuser à bauarder sur le mot de Messe, employé en Hebreu pour vne oblation sacrée & religieuse : & en Latin ; d'où que ce mot vienne, pour signifier le memorial du sacrifice de Iesus Christ, que l'Eglise offre à Dieu continuellement avec l'encens de ses prieres, tandis que le souverain Sacrificateur, qui par son propre sang est entré dans le lieu tres-saint,

intercede enuers Dieu sans cesse pour toute son Eglise. Si le mot est ancien ou nouveau, il n'importe, quoy qu'il est à presumer qu'il fust en vsage en l'Eglise Latine long-temps deuant S. Ambroise, puisqu'il l'employe à mesme sens que nous : qu'il n'en est pas l'auteur, c'estoit le langage ordinaire de son temps.

CHAPITRE III.

Que la Cene de Calvin n'est point la Cene du Seigneur, ni quant aux circonstances, ni quant à la forme. Et premierement des circonstances du temps & du lieu.



E que l'Eglise Latine a entendu, entend, & entendra par le mot de Messie, est de l'institution de Iesus Christ, de la tradition des Apostres, beaucoup plus de vive voix que par écrit. Car de douze il n'y en a qu'un, à sçauoir S. Matthieu,

B iij



qui en ait écrit , & fort succinctement , & comme vn memoire , s'en remettant à l'instruction tres-ample qu'il en auoit donnée de viue voix avec les onze Apostres ses Collegues; Que l'Eglise a conserué & pratiqué depuis les Apostres iusqu'à nous; Qui durera iusqu'à la fin du monde, malgré Satan & ses supposts, qui veulent donner à vne inuention nouuelle , & à vne profaneté le nom de Cene du Seigneur: Car encore que le Parasite n'ait pas adioûté à sa Cene le nom du Seigneur , ie presuppse qu'il l'entend ainsi. Nous luy accorderions aisément celuy de la Cene au sens que Iesus Christ l'employe, quand il dit, que les Pharisiens aiment les premieres places aux Cenes, ou aux soupers, & que S. Marc dit qu'Herode fit vne Cene ou vn souper aux Grands de sa Cour, où le terme Grec *ἀσπιδιον*, qui est Cene en Latin, a esté traduit par ceux de Geneue, banquet. En ce sens on vous peut accorder le mot de Cene, Cene Pharisaïque, Cene d'Herode, Cene de Calvin. Mais vostre Cene, la Cene de Calvin, n'est pas

la Cene du Seigneur , *κλεικὸν δεῖπνον* ,
πράπεζα κυρίου , *ποτήριον τῷ κυρίου*. Mais
ποτήριον δαυμονίων , *πράπεζα δαυμονίων* , *δεῖ-*
πνον δαυμονίων. Oferiez-vous bien dire
que vostre Cene , vostre coupe , vostre
table fust la Cene du Seigneur ? la coupe
du Seigneur , la table du Seigneur , Je
pense que vous le presomez ainsi , puis-
que vous dites que le nom qui met la
difference entre vous & l'Eglise Romaine , est auguste & venerable. Vous en-
tendez sans doute le mot de Cene du
Seigneur. Je vous l'accorde , que ce mot
là de Cene du Seigneur est ancien , au-
guste , venerable , saint & religieux ; mais
il ne vous appartient nullement. Car
vostre Cene n'est point la Cene du Sei-
gneur : Elle est toute de Calvin , qui a
forgé vostre Cene , comme Bucer a-
uoit fait celle des Anglois , & Luther
avec Melancthon celle des Protestans.
Bucer , Luther & Melancthon auoient
gardé les circonstances & les ceremonies
de la Messe , c'est à dire , de la Cene du
Seigneur , & ne s'en estoient pris qu'à la
forme essentielle , au sacrifice , & à l'ado-

ration. Calvin a tout changé, ou pour mieux dire, il a tout aboli, comme il parle luy-mesme. Il a fait vne Cene toute neuue, toute sienne, vne Cene profane, à laquelle il veut donner le vieux, le saint titre de la Cene du Seigneur. Nous considererons les circonstances du temps, du lieu, des personnes, de la matiere; & puis la forme & le formulaire; & finalement le culte & l'adoration ou veneration du S. Sacrement de l'Autel. Calvin a tout raclé, & n'en a rien gardé du tout que le nom, qu'il veut attribuer à son monstre. Pour le temps, la Cene du Seigneur s'est celebrée frequemment, chaque Dimanche, qui estoit le premier iour de la semaine, & tous les iours mesme, selon le témoignage du liure des Actes chap. 2. v. 42. ἡσαν προσκαρτεροῦντες τῇ διδασκῇ τῶν ἀποστόλων καὶ τῇ κοινῳίᾳ καὶ τῇ κλάσει τοῦ ἄρτου καὶ ταῖς προσευχαῖς. C'est à dire, *Ils estoient persueuers en la fraction du pain & aux oraisons, & en la doctrine des Apostres, en la communion.* Et v. 46. du mesme chap. καὶ ἡμέραν τι προσκαρτεροῦντες ὁμοθυμαδὸν ἐν τῷ ἱερῷ, κλῶντες δὲ καὶ τ.

De la Cene de Calvin. 25

οἶκον ἀπὸ τοῦ αἰνοῦντος τὸν Θεόν. C'est à dire, *perseuerans tous les iours d'un commun accord dans le temple, & rompans le pain par les maisons, en loiant Dieu.* Et ceux de Geneue ont mis à la marge de leur version, que la celebration de la Cene estoit iointe à leur deuotion. Et au 20. des Actes saint Paul estant en Troas y ayant seiourné sept iours, il est dit, *Que le premier iour de la semaine, qui est le Dimanche, les Disciples estant assemblez pour rompre le pain, c'est à dire, pour communier, saint Paul s'y trouua, fit le sermon & l'action, & distribua le S. Sacrement.* Ceux de Geneue ont mis à la marge de leur Bible sur ce lieu là, *Que l'Eglise inspirée par le saint Esprit s'assembloit plus volontiers ce iour là qu'au iour du Sabbat.* Et en la premiere Ep. aux Cor. 16. saint Paul represente que l'Eglise s'assembloit, & la collecte se faisoit chaque premier iour de la semaine, qui est le Dimanche. Cela s'est tousiours ainsi pratiqué, comme atteste Iustin Martyr en son Apologetique, qu'il écriuit 150. ans après la Natiuité de Iesus

Christ, ainsi qu'il le dit : L'Eglise s'assembloit tous les Dimanches pour vacquer à la lecture des saintes Ecritures des Apostres & des Prophetes, aux prieres & exhortations, & à la celebration de la sainte Eucharistie, τῇ τῷ ἡλίου ἡμέρᾳ, πάντων καὶ πόλεις ἢ ἀγροῦ μένοντων ὅτι τὸ αὐτὸ συνέλευσις γίνεται, &c. Et vn peu après, τὴν δὲ τῷ ἡλίου ἡμέρᾳ κοινῇ πάντες τὴν συνέλευσιν ποιούμεθα, &c. C'est à dire, que des champs & des villes les fideles s'assembloient en vn lieu pour y vacquer au seruice diuin. Et après auoir communiqué, ils portoient aux absens, qui n'y pouuoient assister, la communion. Depuis encore elle s'est celebrée chaque iour, comme il conste par saint Augustin & autres. Les Lutheriens mesme la font tous les Dimanches & autres Festes, ainsi qu'atteste Melancthon : *Fiunt apud nos Missæ singulis Dominicis & aliis festis.* Calvin trouua qu'il y auoit en cela de l'excès, & l'a reformé. Et ce qui se faisoit tous les iours du temps de saint Augustin, & du temps des Apostres tous les Dimanches, il l'a réduit à

quatre fois l'année, à Pasque, à la Pentecoste, en Septembre, qui est le mois des Kippurims, & à Noël. Voilà la différence quant à la circonstance du temps. La Cene du Seigneur, ou la Messe se faisoit par les Apostres tous les Dimanches pour le moins. Du temps de saint Augustin & depuis, tous les iours. Mais la Cene de Calvin se tient bien plus rare : elle ne se celebre que quatre fois l'année.

Parlons du lieu. Iesus Christ fit sa sainte Cene, le memorial de son sacrifice, au lieu & sur la mesme table qu'il mangea la derniere Pasque avec ses Apostres. Cette table auoit esté sanctifiée & consacrée par Iesus Christ. Elle auoit esté comme vn autel, sur lequel l'Agneau Paschal, le Sacrement de l'ancienne alliance fut posé, & sur lequel encore le vray Agneau, la vraye Pasque se reposa, instituant la nouuelle alliance par son sang répandu. En ce lieu, & sur cette table la figure & la vérité se rencontrent ensemble, & rendent cette table plus venerable que ni l'autel d'airain, ni l'autel & la table d'or du temple de Salomon, où on

mettoit les sacrifices, les pains de proposition, & l'encens. Car ce n'estoient là que des ombres, qui toutefois ont donné vn grand éclat, & beaucoup de veneration au temple de Ierusalem. Combien plus glorieux doit estre le lieu où se trouue le corps & le sang du grand sacrifice, par lequel le Ciel est ouuert, nous y auons l'entrée & l'accès au thrône de grace avec assurance ? C'est la raison pour laquelle aussi l'Eglise Chrestienne si tost qu'elle a pû, a basti des Basiliques, des Temples pour y assembler, pour y celebrer & annoncer la mort de Iesus Christ. Elle a releué des thrônes, qu'elle a appelé des autels, pour y poser la Croix de Iesus Christ, pour y offrir à Dieu le memorial du vrây sacrifice des Kippurims, pour y représenter l'Agneau comme occis, deuant lequel elle se prosterne, luy rendant tout l'honneur qu'il luy est possible. C'est l'accomplissement de la vision de saint Iean au 5. de l'Apocal. où il dit : Je veis l'Agneau comme occis, se tenant sur vn thrône au milieu des quatre animaux, & des vingt-quatre An-

ciens. On n'oseroit nier que le S. Sacrement de l'Autel ne soit l'Agneau comme occis ; & que ce que Eglise Chrétienne appelle l'Autel, ne soit vn thrône sur lequel on releue l'Agneau comme occis. Par les quatre animaux & les vingt-quatre Anciens , la plupart ont entendu les quatre Euangiles & les vingt-quatre liures de l'ancienne alliance, dont on fait la lecture en celebrant la sainte Eucharistie , qui rendent témoignage de Iesus Christ crucifié , qui le font reconnoistre, & luy font faire hommage. Tellest le lieu auquel on celebre la Cene du Seigneur , où l'on fait la Messe avec toute sorte de respect & de deuotion. Auquel l'on peut bien appliquer le propos du Patriarche Iacob : Estant parti de Béerseba d'avec son pere pour aller en Charan, la nuit le prit par le chemin; il coucha sur la terre, & fit son cheuet d'une pierre & s'endormit. Il songea & veit vne échelle posée sur la terre qui s'éleuoit iusqu'au Ciel , sur laquelle les Anges montoient & descendoient , au pied de laquelle il dor-

moit, sur laquelle Dieu estoit appuyé, qui luy parla & luy promit toutes sortes de benedictions. Quand il fut réueillé, il dit: Le Seigneur est en ce lieu cy: Que ce lieu est venerable! c'est icy la maison de Dieu, la porte du Ciel. Et s'estant leué il prit la pierre, dont il auoit fait cheuet, & la posa pour luy seruir d'enseigne: il versa de l'huile dessus, & nomma ce lieu là Bethel, c'est à dire la maison de Dieu: Il fit vn vœu, qu'à son retour, Dieu l'ayant ramené en prosperité il feroit du lieu où étoit cette pierre, vn Temple à Dieu. Iesus Christ fait allusion à cette échelle en l'E-uangile selon S. Iean chap. 1. parlant à Nathanael, Vous verrez dorefnauant les Cieux ouuerts, & les Anges monter & descendre sur le fils de l'homme. Il nous enseigne par ces paroles, que cette échelle, que Iacob veit en songe, estoit vne figure, & qu'il en est la verité. Cette échelle a deux bouts, l'vn sur la terre, l'autre dedans le Ciel. Le Verbe s'est fait chair, est descendu du Ciel, a pris nostre nature à soy en l'vnité de sa personne, est vray Dieu & vray homme. Par luy les

Anges descendent vers nous , & par luy nous montons au Ciel: il ioint la terre au Ciel: il nous a reconciliez avec Dieu, & avec les Anges: il nous donne l'entrée du Ciel; il en est la porte, la voye, la verité, la vie, dont cette échelle n'a esté que figure. Si Iacob voyant la figure en songe a dit du lieu où il s'endormit: Que ce lieu est venerable! c'est icy la porte du Ciel & la maison de Dieu; à plus forte raison devons-nous dire du lieu où nous auons la verité & la realité du songe de Iacob, le corps de Iesus Christ rompu & son sang répandu, par qui le Ciel nous est ouuert, nous sommes reconciliez avec Dieu, nous auons l'entrée du lieu tres-saint, nous auons communication avec les Anges. O que ce lieu est venerable! Ce n'est icy que la maison de Dieu, que la porte du Ciel: Et quel honneur, quel respect ne devons-nous pas rendre au lieu sur lequel l'Agneau comme occis est posé? Quand Moysé veit au desert le buisson ardent qui ne se consumoit point, s'approchant pour sçauoir que c'estoit, Dieu luy dit: Déchauffe tes

souliers, car le lieu sur lequel tu marches est sacré. Ce lieu estoit sacré, parce que Dieu y témoignoit sa presence, conseruant ce buisson au milieu des flammes, & parlant à Moïse du milieu du buisson. L'Eglise est comme ce buisson, que Dieu conserue parmy les feux & les flâmes, en laquelle il est present, en laquelle il nous parle, il nous appelle, & se communique à nous par sa parole & par ses Sacremens. Et le lieu où elle s'assemble, où Dieu parle, où il est present, où il se communique, où est le corps rompu & le sang répandu de Iesus Christ, ne sera-t-il pas vn lieu saint? Anatheme, Anatheme qui ne le reuere. Qu'a fait la Cene de Caluin en France? Qu'ont fait, ou que n'ont pas fait ses communians par leur reformation pretendue? Ils ont ruiné, desolé, démoli tant qu'ils ont pû les Eglises, les Autels, les lieux saints. Ils ont abatu le thrône sur lequel l'Eglise releue l'Agneau comme occis. Et que font-ils à leur Cene au lieu de ce thrône? Ils arrangent vne chetive table le matin qu'ils la font, en quelque endroit du

du lieu où ils s'assemblerent. S'il vient à point dans vne basse-cour, dans vne grange, en campagne. Ils n'y cherchent pas tant de façon. Après qu'ils ont fait leur Cene, ils ostent de là cette table. Voilà la difference de la Cene du Seigneur, & de la Cene de Calvin, quant au temps & quant au lieu.

CHAPITRE IV.

Des circonstances de la personne des communians au S. Sacrement, où il est traité de la Confession, tant publique qu'auriculaire, ¶ de la matiere du S. Sacrement.



OYONS la difference des personnes de la Cene de Iesus Christ, d'avec celles de la Cene de Calvin. En la Cene de nostre Seigneur il y a deux sortes de personnes. L'une est pour consacrer & pour administrer la sainte Cene, & l'autre pour la recevoir

C

& pour communier tant seulement. Alors que Iesus-Christ l'institua & l'ordonna, ce fut luy-mesme qui consacra & qui administra la sainte Eucharistie, qu'il appelle la nouvelle alliance par son sang. En l'appellant nouvelle & en l'instituant, il met fin à la vieille. Pour faire cela il estoit necessaire qu'il en eust l'autorité, & la puissance. Il l'auoit receuë de celuy qui luy dit, Tues mon fils: Tues sacrificateur à iamais, selon l'ordre de Melchisedec. Qui l'auoit consacré avec serment à perpetuité, ainsi que l'Apostre le qualifie, ὃν εἰς τὸν αἰῶνα τετελειωμένον. Heb. 7. c'est à dire, *le fils consacré à perpetuité*. C'est en cette qualité là & en cette autorité qu'il procede, establisant la nouvelle alliance par son sang. Les assistans & les comunians sont les Apostres, qui estoient tous saints & nets, horsmis vn, celuy auquel il donna le morceau trempé, qui aussi-tost s'en alla & sortit dehors, dit S. Iean. Il mangea bien la Pasque avec son Maître, & ses collegues. Mais Iesus-Christ le fit sortir deuant que donner sa chair &

son sang. Comme on peut recueillir du chap. 13. de l'Evangile selon S. Iean, qui explique particulièrement & clairement ce qu'on ne peut entendre par S. Matthieu & par S. Marc que difficilement. Les Apostres & leurs successeurs ont pratiqué ce que Iesus leur auoit commandé de faire en la celebration de la sainte Cene. Les vns faisans la charge & la fonction de Sacrificateurs, & les autres participans à ce saint sacrifice. Les vns ayans l'ordre sacré, les autres estant santifiez & nets. Ainsi S. Paul veut-il, *que chacun s'éprouue soy-mesme*, δοκιμαζέτω δὲ ἑαυτὸς ἄνθρωπος ἑαυτὸν. Ainsi qu'il ne s'approche point de cette table αἰσχροῦς indignement, μὴ ἀλαχρίων τὸ σῶμα τῷ κυρίου ne rendant pas au saint Sacrement, qu'il nomme le corps du Seigneur, l'honneur qui luy est deu. La regle & la loy que l'Apostre dōne à l'Eglise de Corinthe, il la tient de Iesus-Christ mesme & du saint Esprit. Elle est generale & vniuerselle. Elle regarde tout le corps de l'Eglise en tout temps & en tout lieu sans exception. Chacun se doit exami-

ner, se disposer, & se mettre en estat, se rendre digne de participer à la sainte Cene du Seigneur en discernant ce corps & ce sang precieux. Tant ceux-là qui consacrent & qui administrent la sainte Eucharistie, que ceux à qui elle est administrée. Nul ne la peut consacrer & administrer que par l'ordre de la Prêtrise & sacraficature establi en l'Eglise, & par l'autorité que Iesus-Christ a donné aux Apostres, les Apostres à leurs successeurs. Et nul ne doit estre admis à communier, qui ne fasse profession de la foy Catholique & Orthodoxe, & qui ne rende témoignage de sa foy par sa bonne vie. Tant les vns que les autres doiuent auoir la foy avec la sainteté & pureté. Les vns & les autres doiuent faire ce que dit l'Apostre 2. Cor. 13. 5. *ἑαυτοὺς πειράζετε εἰ ἐστὲ ἐν τῇ πίστει. ἑαυτοὺς δοκιμάζετε*, c'est à dire, *examinez-vous vous mesmes si vous estes en la foy. Eprouuez vous vous mesmes.* Chacun doit aussi examiner sa vie, & s'approcher de la sainte Cene du Seigneur, qui est son sacrifice, son corps rompu

& son sang répandu , par la confession de ses pechez.

Le titre & la qualité que Iesus Christ donne à sa Cene. Mon corps rompu pour vous, mon sang répandu pour vous en remission des pechez, oblige de toute neecessité les communians à la confession de leurs pechez. Car le corps de Iesus Christ rompu & son sang répandu en remission des pechez est vn sacrifice propitiatoire pour ceux qui ont peché. C'est le grand sacrifice des Kippurims pour les pechez de tous les hommes. Ceux-là donc qui ont recours à ce sacrifice se reconnoissent pecheurs. Car s'ils ne l'estoient ils n'auroient pas besoin de sacrifice pour leurs pechez. Ceux qui n'ont point peché n'ont pas à faire de pardon. Les sains n'ont point besoin de medecine. Et les malades declarent & representent au Medecin leurs maux avec toutes les circonstances.

La Communion donc au saint Sacrement de la Cene du Seigneur oblige tous les communians à la confession de leurs pechez. C'est pour cela qu'en la

C iij

Messe tant celuy qui l'administre, que ceux qui y assistent commencent par le *Confiteor*. C'est vne exacte obseruation de l'exhortation de saint Iacques chap. 5. *ἐξομολογήσθε ἀλλήλοις τὰ ὁμιώματα, καὶ ἐυχέσθε ὑπὲρ ἀλλήλων*. C'est à dire, *confessez vos pechez les uns aux autres, & priez les uns pour les autres*. Cette confession là est generale & publique. Mais il y en a encore vne particuliere, que l'Eglise pratique & qu'elle appelle auriculaire, contre laquelle Protestans & Puritains inuectiuent, & l'ont tout à fait abolie entre eux. Ils ont reietté la generale, & la publique de leur Cene. Il est vray qu'ils en font vne toutes les fois qu'ils s'assemblent, qui est ridicule & scandaleuse, par laquelle ils se font leur procez, en disant que par leur vice ils transgressent sans fin & sans cesse les Commandemens de Dieu, conformément à leur creance, qui porte que toutes leurs iustices, & bonnes œuvres sont comme le drap souillé de la femme, dequoy nous parlerons vne autre fois. Il suffit maintenant de leur prou-

uer, que l'une & l'autre confession est vn preparatif & vne disposition necessaire à celuy qui veut participer au sacrifice propitiatoire de nostre Seigneur. Que l'une & l'autre est de droit diuin. Pour la publique & generale ils ne l'oseroient nier, encore qu'ils ne la pratiquent pas au Formulaire de la Cene Calvinienne, qui renuoye chacun à sa bonne intention, & au témoignage interieur de son cœur. Mais ils en veulent principalement à la confession auriculaire, qu'ils nient estre de droit diuin, & soutiennent qu'ils ont bien-fait de la retrancher du tout, & nous alleguent l'exemple de Nectarius Euesque de Constantinople, le predecesseur de saint Chrysostome, qui à cause d'un scandale arriué par l'impieté d'un Diacre, & l'impudicité d'une miserable pecheresse, en abolit l'usage dans l'estendue de sa iurisdiction. Ainsi que le rapporte Sozomene au recueil de l'histoire des trois Auteurs Theodorit, Socrate, & Sozomene. Laissons là Nectarius, qui au lieu de faire vn exemple d'anatheme

contre les coupables, s'en est pris à vn ordre tres-saint & tres-religieux. Constantinople en a souffert & en souffre la peine, Aussi bien que les sept Eglises d'Asie, dont il est parlé au commencement de l'Apocalypse, ont receu le salaire de leurs iniquitez. Mais cette histoire-là fait foy que la Confession auriculaire estoit obseruée par l'Eglise Chrétienne d'Orient durant les premiers siecles d'après les Apostres. Qu'elle fut supprimée à Constantinople sous pretexte de reformation, & les communians y furent dispensez de la Confession auriculaire enuiron quatre cens ans après la natiuité de Iesus-Christ. Mais la mesme histoire témoigne aussi que l'Eglise Chrestienne d'Occident, c'est à dire la Latine, a demeuré ferme & inébranlable dans l'observation de la Confession auriculaire, qu'elle tient encore aujourdhuy inuiolablement. Tellement que par la propre declaration des Aduersaires il conste, que deuant l'attentat de Nectarius toute l'Eglise Chrestienne, tant en Orient qu'en Oc-

cident , tant Grecque que Latine , gar-
doit religieusement la Confession auri-
culaire : & que nonobstant le mauuais
exemple des Grecs de Constantinople ,
l'Eglise Romaine l'a religieusement con-
seruée. Ce n'est pas tout , on peut prou-
uer encore par le témoignage des Peres
Grecs qu'elle est de droit diuin. Nous
n'en rapporterons que de deux , qui sont
fort experts. L'un de Theophylacte sur
ces paroles del'Euangile selon saint Iean
chap. 13. Vous estes nets , mais non pas
tous , ἔτις ἐν διὰ τῆς ἐξομολογήσεως δυνά-
μεθα νίψασθαι ὥς μὴ αἰσχίως μετάρχωμεν τῆ
δείπνου καὶ κρίμα ἑαυτοῖς φάγωμεν καὶ πίωμεν.
*C'est à dire , que par la confession nous pou-
uons estre lauz afin de ne point participer à
la Cene indignement , mangeant & beuuant
nostre condemnation.* L'autre est de S. Ba-
file au liure de ses exercices des bréues
questions & réponses, en la question 288.
συνή. αἰσκαῖον τοῖς πεπιστευμένοις τὴν οἰκο-
νομίαν τῆς μυστηρίου τῆ Θεοῦ ἐξομολογεῖσθαι
τὰ ἁμαρτήματα. ἔγω γὰρ καὶ οἱ πάλαι μετα-
νοοῦντες ἐπὶ τῇ ἀγίῳ ἐπίσκοποιται πεποιηκό-
τες. γέγραπται γὰρ ἐν τῷ ἐὼαγγελίῳ ὅτι τῷ

Βαπτιστῇ Ἰωάννῃ ἐξομολογοῦτο ταῖς ἀμαρτίαις αὐτῶν. ἐν δὲ ταῖς πράξεσι τοῖς Ἀποστόλοις ὑφ' οἷν καὶ ἐβαπτίζοντο ἅπαντες. C'est à dire, *Il faut nécessairement confesser ses pechez à ceux à qui la dispensation des Sacremens de Dieu a esté commise. Car ainsi trouue-t-on dans la sainte Ecriture que les Penitens en ussoient. Il est écrit en l'Evangile qu'ils confessoient leurs pechez à Jean Baptiste; & au liure des Actes, qu'ils se confessoient aux Apostres, par lesquels ils estoient baptisez.* S. Cyprian en ses Epistres 10. & 11. dit, qu'il n'estoit loisible à aucun de communier, qu'il n'eust fait sa confession des moindres pechez, sa penitence, & receu l'absolution de l'Euesque, ou de ceux du Clergé. Mais venons à la loy & au commandement, à la sainte Ecriture. Je ne veux point presser l'exemple de la pecheresse, qui vient pleurer aux pieds du Seigneur chez Simon le Pharisien en la ville de Naim de Galilée, en S. Luc chap. 7. ni celuy de Zachée, Luc. 19. ni celuy de l'enfant prodigue, Luc. 15. qu'on peut rapporter à la confession particuliere que chacun doit faire à Dieu de ses pechez:

comme tous les Pſeaumes de la penitence de Daud en font foy. Et il n'y a point de remiſſion des pechez ſans confeſſion. Vous avez les deux lieux cortez par ſaint Baſile, de S. Iean Baptiſte, & des Actes, par leſquels il prouue la confeſſion auriculaire. Mais ie demande, pourquoy Ieſus Chriſt a-t-il donné à ſes Apoſtres la clef du Royaume des Cieux, la puiſſance de lier & délier, de pardonner les pechez aux penitens & de les abſoudre, ou de reietter les impenitens & de les condamner? Matth. 16. & 18. Iean 20. Pourquoi a-t-il conſéré cette autorité à ſes Apoſtres & à leurs ſucceſſeurs? Sinon afin que les pecheurs vinſſent à eux, confeſſer leurs pechez, receuoir inſtruction, conſolation, abſolution?

Ieſus Chriſt accompliſſant la loy, mettant fin aux ceremonies, à la Paſque, aux ſacrifices Leuitiques, qui n'eſtoient que des ombres & des figures, dont il eſt la lumiere & la verité; la ſacrificature Leuitique a auſſi pris fin, elle a eſté changée & tranſmiſe. Il a eſté fait ſouuerain Sacrificateur ſelon l'ordre de Melchiſe-

dec, comme l'enseigne l'Apostre en l'Epistre aux Hebreux, & au lieu en la place des autres Sacrificateurs & des Leuites, il a establi ses Apostres & leurs successeurs à la Liturgie & au ministere de son sacrifice, duquel l'Apostre traite particulièrement en l'Epistre aux Hebreux. Ce sacrifice par lequel il a fait la veritable propitiation de nos pechez : Il les a abolis : Il est entré dans le lieu tres-saint : Ce sacrifice de foy-mesme : Ce sacrifice duquel il a establi le Memorial, qui durera iusqu'à la fin du monde iusqu'à ce qu'il vienne : Ce sacrifice par lequel il est non seulement entré dans le lieu tres-saint, mais il nous y en a donné l'entrée, comme dit l'Apostre aux Hebreux chap. 10. vers. 19. & suiuaus, que nous auons l'entrée des lieux saints par le moyen du sang de Iesus tout frais tué, viuant, ἐνεχρίσεν ἡμῖν ὁδὸν πρόσφατον καὶ ζῶσαν. par le voile, c'est à dire sa chair. Par lesquelles paroles le saint Apostre signifie le S. Sacrement de l'Autel. C'est la Liturgie & le sacrifice de la foy Chrestienne dont parle l'Apostre aux Phil. 2. vers. 17.

θυσίαι καὶ λειτουργίαι τῆς πίστεως ὑμῶν. La Liturgie à laquelle vacquoient les Apostres, dont il est dit au liure des Actes 13. λειτουργοῦντων αὐτῶν. Le sacrifice & la Liturgie dont nostre Seigneur est l'autel luy-mesme, au pied duquel les Apostres & les Saints ἀνέδονται *libantur*, *versent leur sang*, comme cela est representé, Apocal. 6. vers. 9. Les saints Apostres ont serui à cet autel. Ils se sont employez au Ministère & à la Liturgie de ce sacrifice par la predication de l'Euangile, & par l'administration des saints Sacremens. Et avec les Apostres, & par les Apostres Dieu a établi en son Eglise Prophetes, Euangelistes, Pasteurs, Docteurs, & autres ordres, pour l'assemblage des Saints, pour l'œuvre du Ministère, pour l'edification du corps de Christ. 1. Cor. 12. Ephes. 4. Tous les fideles qui sont participans de la vocation celeste, κλήσεως ἐπουρανίου μέτοχοι, Hebr. 3. s'approchent de cet autel, viennent à ce sacrifice, μετὰ ἀληθινῆς καρδίας ἐν πληροφορίᾳ πίστεως ἑξάραισμένοι τὰς καρδίας ὑπὸ συνειδήσεως πονηρᾶς λελουμένοι τὸ σῶμα ὕδατι κα-

θαρῶ κατέχοντες τὴν ὁμολογίαν τῆς ἐλπίδος
 ἀκλινῇ. Hebr. 10. vers. 22. 23. C'est à di-
 re, avec un cœur sincere, la foy parfaite,
 ayant les cœurs purgez d'une mauuaise con-
 science, les corps lauez d'eau nette, retenant
 la confession de l'esperoir inuariable. Où il
 faut remarquer en passant la difference
 de la bonne confession, de la confession
 salutaire que l'Apostre qualifie, ὁμολογίαν
 τῆς ἐλπίδος ἀκλινῇ, d'auec la confession de
 desesperoir, la confession damnable, telle
 que celle de Iudas, qui dit : J'ay peché
 en trahissant le sang innocent, & se des-
 espera, se precipita. La bonne confes-
 sion s'appelle confession de l'esperoir inua-
 riable. Voilà l'estat auquel doit estre ce-
 luy qui s'approche de cet autel, qui veut
 communier au sacrifice de Iesus Christ.
 Il faut qu'il ait vn cœur sincere, vne fer-
 me foy, vne ame repurgée de mauuaise
 conscience, qu'il ait esté baptizé en re-
 mission de ses pechez, & qu'il fasse la con-
 fession de ses pechez sans feinte avec e-
 spoir; si au partir du S. Baptesme il ve-
 noit aussi-tost à la communion de la sain-
 te Cene, il n'auroit pas besoin d'autre

confession que de celle qu'il a faite auant le Baptisme, estant tout net. Mais s'il a vécu depuis son Baptisme quelques années, s'il a conuersé long-temps, s'il a fait beaucoup de chemin parmy les hommes de ce siecle, encore qu'il ait le corps laué d'eau nette, qu'il ait toutes les qualitez requises par l'Apostre, il a besoin de lauer ses pieds par vne franche confession de ses fautes, qu'il a commises depuis le Baptisme, avec espoir de grace & de pardon. C'est ce que le Seigneur enseigne à ses Apostres au 13. de l'Euan-gile selon S. Iean. S'estant assis à table avec eux pour manger la Pasque, & après auoir soupé, pour instituer le Sacrement de la nouuelle alliance par son sang, il se leua de table auant l'une & l'autre Cene, posa son habit, se ceignit d'un grand linge, & vint avec de l'eau dans vne cuuette pour lauer les pieds de ses Apostres, & puis les essuyer. Il vint donc vers Pierre, qui iugea qu'il n'estoit pas iuste que son Seigneur, luy rendist ce seruice. Il luy dit, Seigneur, me laueriez-vous les pieds? Iesus luy répondit, Tu ne sçais pas ce

que ie fais, tu l'entendras après. Pierre repartit, Seigneur, vous ne me lauez iamais les pieds. Iesus luy dit, Si ie ne te laue, tu n'auras iamais part avec moy. Pierre voyant la resolution de son Maître, receuant sa parole comme vn commandement, s'y soumet par obéissance, & luy fait sa confession en disant, Seigneur, non seulement les pieds, mais les mains & la teste. Iesus luy dit, Celuy qui est tout lauë, n'a pas besoin que de lauer ses pieds, estant tout net. Et vous estes nets, mais non pas tous. Cette action du Seigneur & les paroles nous enseignent, Qu'il faut estre net pour manger à sa table, tels qu'estoient les Apostres, excepté Iudas Iscariot; il faut estre lauë par le Baptême; il faut auoir la foy; il faut auoir l'ame épurée de tout remord d'une mauuaise conscience. Mais il est necessaire encore de lauer ses pieds, d'examiner sa vie & ses actions, par vne confession particuliere des pechez que l'on commet tous les iours en conuersant avec les hommes de ce siecle, par des œuvres mauuaises, de mauuaises paroles, de mauuaises

naïses pensées. Il faut prendre instructiō
& correction d'un Confesseur: ioindre
à la confession la contrition, la satisfac-
tion, & l'amendement. Ainsi ayant les
pieds lauez, le corps & le cœur net, on
peut faire la Cene. C'est à quoy nous o-
blige encore le S. Apostre au 4. ch. de
l'Epistre aux Hebr. exhortant les fideles
d'entrer dans le repos de Dieu, & comme
dit le Prophete Esaie ch: 1. *hiddelu barcah
limmedu hetib.* Cessez de faire mal, ap-
prenez à bien faire. Ayant dit que Dieu
penetre iusqu'aux plus secretes pensées,
& qu'il en iuge, que toutes choses luy
sont connues & decouuertes, il adiouste,
*ἐχρητις οὐκ ἀρχιερέα μέγαν δηλονότι ποιῶ
οὐρανὸν Ἰησοῦ τὸν υἱὸν τοῦ Θεοῦ, κρατῶμεν
τῆς ὁμολογίας.* C'est à dire; qu'ayant un
grand & Souuerain Pontife, qui est entré
dedans le Ciel, à sçauoir Iesus le fils de Dieu,
tenons-nous à la confession. Où il entend
parler de la confession qu'il faut faire de
ses pechez pour obtenir misericorde,
qui comprend tant la particuliere secre-
te & auriculaire, que la publique com-
mune & generale, en recommandant

l'une & l'autre pour s'approcher du trône de grace, pour obtenir misericorde & trouuer grace & secours opportun, προσερχόμεθα μετὰ παρρησίας τῷ θρόνῳ τῆς χάριτος, ἵνα λάβωμεν ἔλεον καὶ χάριν εὐωμῶν εἰς εὐχαριον βοήθειαι. Mais n'est-ce pas vne chose bien estrange d'oser nier, que la confession des pechez tant l'auriculaire que la publique soit de droit diuin, veu qu'elle n'est pas seulement eniointe & pratiquée sous la nouvelle alliance, mais qu'elle est expressément commandée & ordonnée sous l'ancienne alliance par Moysse? Il laisse l'exemple de Dauid, qui confessa son peché à Nathan: & ce qui est dit au 16. du Leuit. du sacrifice des Kippurims qu'Aaron poseroit ses deux mains sur la teste du Bouc, & confeseroit toutes les iniquitez du peuple. Mais ie maintiens que la Confession auriculaire estoit exactement & commandée, & pratiquée sous l'ancienne alliance. Car vous auez au Leuit. chap. 4. 5. & 6. la loy des sacrifices pour tous les pechez & de toutes sortes, & pour tou-

tes qualitez de personnes. On amenoit aux Sacrificateurs pour les sacrifices de propiciation & pour les pechez, les mesmes especes de viâtes que pour les sacrifices d'actions de grâces, & de prosperité, du gros & du menu bestial, & il falloit necessairement dire au Sacrificateur, si c'estoit pour vn sacrifice de prosperité & d'actions de grâces, ou bien si c'estoit vn sacrifice pour le peché. Surquoy il falloit informer particulierement le Sacrificateur du peché qu'on auoit commis, & de toutes les circonstances, afin qu'il iugeast si le sacrifice estoit competant, & qu'est-ce qu'il falloit faire. Mesmes au 5. chap. Leuit. v. 5. il est dit par exprés que le pecheur confessera quel sera son peché. Ainsi demeure bien prouué & verifié que la confession, tant publique & generale, que particuliere & auriculaire est commandée de Dieu, est necessaire pour se disposer à la communion de la sainte Cene du Seigneur, afin d'y participer dignement. C'est ce qui est religieusement obserué en la Messe par

D ij

l'Eglise Catholique Apostolique Romaine. Mais en la Cene de Caluin on n'y fait pas tant de façons. Pourueu que vous ayez vn mercau ou vne marque, vous y pouuez venir, en la baillant à celui qui les reçoit quand on vient à la table. Et si d'auanture vous l'avez oublié ou égaré, en donnant quelque sol à la place, vous passez. C'est assez qu'on connoisse que vous auez intention de faire la Cene. Voilà toute la ceremonie qu'ils y font.

Pour la matiere de laquelle le Seigneur Iesus se seruit au S. Sacrement, nous lisons qu'il employa le pain & le vin dont il auoit celebré la Pasque. C'estoit du pain azyme, c'est à dire sans leuain, & du vin tel qu'on le buuoit au souper de la Pasque, qui estoit trempé avec de l'eau. Car on n'y buuoit pas le vin tout pur. Les Apostres ont obserué l'institution du Seigneur, avec toutes les circonstances conuenables. Et comme ils auoient préparé le pain & le vin dont Iesus Christ celebra la Pasque avec eux, selon leur demande, & le com-

mandement qu'il leur en fit : Aussi celebrant la sainte Eucharistie, qu'ils ont appellé nostre Pasque, ils ont preparé le pain & le vin qu'ils deuoient consacrer & faire le corps & le sang du Seigneur. Et semble que l'Apostre saint Paul en la 1. Cor. 5. fonde l'exhortation, qu'il fait aux fideles par vne sainte allegorie, sur la pratique de l'Eglise au saint Sacrement : *ἐκκαθαίρετε οὖν τὴν παλαιὰ ζύμην, ἵνα ᾦτε νέον φύραμα καθώς ἐστε ἄζυμοι· καὶ γὰρ τὸ πάχα ἡμεῶς ἐτύθη Χριστός. Ὡς ἐορτάζωμεν μὴ ἐν ζύμῃ παλαιᾷ.* C'est à dire, *Repurgez le vieil leuain, afin que vous soyez une nouvelle pâte, comme vous êtes sans leuain. Car nostre Pasque Christ a esté immolé pour nous. Pourquoy faisons la feste, non point avec du vieil leuain, &c.* Quant au calice mêlé d'eau, Iustin Martyr en son Apologétique parlant du S. Sacrement de l'Autel fait expresse mention *ὡς χαρισθῆναι τοῦ ἁγίου καὶ οἴνου καὶ ὕδατος.* C'est à dire, *du pain consacré, du vin & de l'eau.* S. Cyprien en l'Epistre 63. à Cecilian dit plus de douze fois, que le vin de la sainte

Eucharistie est mêlé d'eau, & maintient que cela est de l'essence du S. Sacrement. Et tous les anciens parlant du Calice disent que c'est du vin trempé avec de l'eau. L'Eglise Romaine l'a toujours ainsi pratiqué, & le pratique encore. Luther & ses sectaires l'observent aussi. Mais la reformation en France a ordonné qu'on employeroit en leur Cene du pain leué, du pain commun, tel qu'il se rencontre à l'ordinaire du Ministre, ou de l'Ancien, ou chez le Boulanger qu'on le va prendre. On met ce pain par tranches dans vn bassin, après avoir osté la crouste. Pour le vin, la reformation porte de n'y point mêler d'eau, de le boire tout pur. A Geneve, la reformation fut de remplir vn bassin de grandes oublies, dont on rompoit des petits morceaux qu'on donnoit aux communians comme ils passoient. Mais depuis quelques années ils ont changé de methode, à la remonstrance, & à la priere des Reformez de France, tellement qu'ils vsent maintenant en leur Cene de pain commun qui est leué.

Voilà pour ce qui est des circonstances du temps, du lieu, des personnes, & de la matiere de la Cene de Iesus Christ : dont Caluin n'a rien retenu en sa nouvelle Cene.

CHAPITRE V.

De la forme substantielle du S. Sacrement, & du Formulaire de la Cene Caluinienne.



PARLONS maintenant du principal ; Il nous faut considerer la forme & la substance de la sainte Eucharistie. C'est la consecration & la benediction du pain & du vin, que Iesus Christ a fait par ses actions de graces, son corps rompu & son sang répandu. Ainsi qu'il le prononce en les donnant à ses Apostres, leur recommandant de faire comme il auoit fait pour son memorial. Les trois Euangelistes donc avec S. Paul nous represen-

D iiii

rent cette benediction. S. Matthieu & S. Marc disent que Iesus ayant pris le pain, & l'ayant beni, rompit, & donna. Ceux de Geneue ont traduit *ἑλόγησας* en leur derniere version, *ayant rendu graces*, redoutans le mot de benir. Mais le sieur Diodati ne les approuue pas en la sienne, qui a tres bien traduit *ἑλόγησας*, *ayant fait la benediction*. Il est vray que S. Luc & S. Paul au lieu du verbe *ἑλόγησας* ont employé celuy de *ἑχαρισήσας*, comme ont fait S. Matthieu & S. Marc en parlant de la coupe, qui disent que Iesus prit la coupe, & ayant rendu graces, *ἑχαρισήσας*, la donna. Mais cette action de graces inferc la benediction & du pain & de la coupe. C'est pour cela que saint Paul parlant de la coupe dit, la coupe de benediction laquelle nous benissons. Le Seigneur donc par son action de graces a beni le pain & la coupe de sa sainte Cene, auant que de les donner à ses Apostres, & les a fait par son action de graces & par sa benediction son corps & son sang, comme il le prononce, commandant à ses

Apostres de faire comme luy. Ce qu'ils ont obserué & recommandé à l'Eglise, comme vn depost sacré & precieux, que l'Eglise a gardé & qu'elle conserue iusqu'à la fin du monde, malgré les attentats des Heretiques perturbateurs de sa paix & de son vnion. Elle n'a iamais manqué de consacrer par vne sainte Liturgie, par des actions de graces, par la benediction, le pain & le calice pour estre faits le corps & le sang de Christ. Iustin Martyr en est vn fidele témoin, qui dit en son Apologetique, que celuy qui fait l'office, auant la communion, *ἔχει χάρις καὶ τὸ κατηξίωσθαι τοῦτον παρ' αὐτῷ ἐπὶ πολὺ ποιεῖται*, *fait vne longue action de graces*. Et vn peu après il redit encore, que celuy qui preside au mystere *ἔχει καὶ χάρις καὶ ἐν χάριτι ὅση δύναμις αὐτῷ ἀναπέμπει*, *qu'il fait à Dieu prieres & actions de graces de tout son pouuoir*. Ausquelles le peuple répond, *Amen*. Et qu'après on donne la communion *τῷ ἐν χάριτι ἔντων* du saint Sacrement dont on a rendu graces, & qu'on le porte aux absens, Toute l'Eglise Chrestienne l'a

ainsi pratiqué par l'Asie, l'Afrique, l'Europe, ainsi qu'il apert par leurs Liturgies, que des hommes doctes, & non suspects, ont recueilli & publié. Ce qui se trouue dans saint Ambroise au liure 4. des Sacremens, chapitres 5. & 6. fait foy que la priere de l'Eglise Latine pour la consecration, estoit en vsage de son temps. Bref l'aduersaire ne peut nier, que cette action de graces, que Iesus a fait, & les Apostres après luy, qui n'est point écrite par les Apostres, mais enseignée par tradition de viue voix, conseruée par toutes les Eglises, ne soit formelle & essentielle à la Cene du Seigneur; laquelle ayant esté abolie par Calvin en sa Cene, par consequent la Cene de Calvin n'est point la Cene du Seigneur, ni quant aux circonstances, ni quant à son essence & à sa forme. Et c'est vn pur sacrilege à Calvin de donner à sa Cene le nom de Cene du Seigneur, n'ayant la Cene de Calvin rien de commun avec la Cene du Seigneur, ni quant au temps, ni quant au lieu, ni quant à la qualité & disposition

des personnes qui l'administrent, ou qui y communient, ni quant à la matiere, ni quant à l'essence & à la forme. Car l'essence & la forme de la Cene du Seigneur gist & consiste en l'oblation à Dieu du pain & du calice par vne deuë action de graces, qui finit par les paroles du Seigneur: *Cecy est mon corps rompu & mon sang répandu*, en vertu desquelles le pain & le calice sont faits le corps & le sang de Iesus Christ, qui accomplit ce qu'il a prononcé de sa propre bouche, & qu'il prononce encore par la bouche de ceux qui officient en son nom, & qui offrent à Dieu par son commandement son corps rompu & son sang répandu. Mais en la Cene de Calvin il n'y a ni oblation, ni consecration: en voicy le Formulaire tout entier, qu'ils lisent lors qu'ils font leur Cene, & qu'ils pratiquent, tout de mesme qu'il est imprimé à la fin de leurs Pseaumes, dont le titre est :

LA MANIERE de celebrer la Cene.

Formulaire
de la Cene
de Calvin
fait par Cal-
uin.

ECOUTONS comme Iesus Christ nous a institué sa sainte Cene selon que S. Paul le recite au chap. 11. de la premiere Epistre aux Corinth. J'ay receu, dit il, du Seigneur ce que ie vous ay baillé. C'est que le Seigneur Iesus la nuit qu'il fut liuré, prit du pain, & après auoir rendu graces le rompit, & dit, Prenez mangez, cecy est mon corps qui est rompu pour vous, faites cecy en memoire de moy. Semblablement après auoir souppé print la coupe disant, Cette coupe est le nouueau Testament en mon sang, faites cecy toutesfois & quantes que vous en boirez en memoire de moy. C'est que quand vous mangerez de ce pain & boirez de cette coupe, vous annoncerez la

mort du Seigneur iusqu'à ce qu'il vienne. Pourtant quiconque mangera de ce pain, ou boira de cette coupe indignement, il prend sa condamnation, ne discernant point le corps du Seigneur. Nous auons ouy, mes Freres, comment nostre Seigneur a fait sa Cene entre ses Disciples, & par cela nous demonstre que les estrangers, c'est à dire ceux qui ne sont pas de la compagnie des fideles n'y doiuent point estre admis. Parquoy suiuant cette regle au nom & en l'autorité de nostre Seigneur Iesus Christ, i'excommunie tous idolâtres, blasphemateurs, contempteurs de Dieu, Heretiques, & toutes gens qui font sectes à part pour rompre l'unité de l'Eglise, tous pariures, tous ceux qui sont rebelles à pere & à mere & à leurs superieurs, tous seditioneux, mutins, bateurs, noisieux, adulteres, paillards, larrons, auaricieux,

usuriers, ravisseurs, yurognes, gourmans, & tous ceux qui menent vie scandaleuse. Leur dénonçant qu'ils ayent à s'abstenir de cette sainte table, de peur de polluer & contaminer les viandes sacrées que nostre Seigneur Jesus Christ ne donne, sinon à ses domestiques & fideles.

Pourtant selon l'exhortation de saint Paul, qu'un chacun éprouue & examine sa conscience pour sçavoir s'il a vraye repentance de ses fautes & s'y déplaist, desirant de viure d'oresenauant saintement & selon Dieu. Sur tout s'il a sa fiance en la misericorde de Dieu, & cherche entierement son salut en Jesus Christ, & renonçant à toute inimitié & rancune a bonne intention & courage de viure en concorde & charité fraternele avec ses prochains. Si nous auons ce témoignage en nos cœurs deuant

Dieu, ne doutons nullcment qu'il ne nous auouë pour ses enfans, ¶ que le Seigneur Iesus n'adresse sa parole à nous pour nous introduire à sa table, ¶ nous presenter ce saint Sacrement lequel il a communiqué à ses Disciples. Et combien que nous sentions en nous beaucoup de fragilité ¶ misere, comme de n'auoir point la foy parfaite, mais estre enclins à incredulité ¶ défiance; comme de n'estre point entierement si adonnez à seruir Dieu, ¶ d'un tel zele que nous deurions, mais auoir à batailler iournellement contre les conuoitises de nostre chair. Neantmoins puisque nostre Seigneur nous a fait cette grace d'auoir son Euangile imprimé en nostre cœur pour resister à toute incredulité, ¶ nous a donné ce desir ¶ affection de renoncer à nos propres desirs pour suiure sa iustice ¶ ses saints commandemens, soyons tous certains que les vi-

ces & imperfections qui sont en nous ;
n'empescheront point qu'il ne nous recoi-
ue , & nous fasse dignes d'avoir part en
cette table spirituelle. Car nous n'y ve-
nons point protester que nous soyons par-
faits & iustes en nous mesmes. Mais
au contraire , en cherchant nostre vie en
Jesus Christ , nous confessons que nous
sommes en la mort. Entendons donc que
ce sacrement est une medecine pour les
pauvres malades spirituels , & que tou-
te la dignité que nostre Seigneur requiert
de nous , c'est de nous bien reconnoistre
pour nous déplaire en nos vices , & avoir
tout nostre plaisir , ioye & contente-
ment en luy seul. Premièrement donc
croyons à ces promesses que Iesus Christ
qui est la verité infallible a prononcé de
sa bouche. A sçavoir qu'il nous veut
vraiment faire participans de son corps
& de son sang , afin que nous le possédions
en-

entierement, de sorte qu'il viue en nous
 & nous en luy. Et combien que nous ne
 voyons que du pain & du vin, toute-
 fois ne doatons point qu'il n'accomplisse
 spirituellement en nos ames tout ce qu'il
 monstre exterieurement par ces signes
 visibles. C'est à dire qu'il est le pain cele-
 stiel pour nous repaistre & nourrir à vie
 eternelle. Ainsi que nous ne soyons point
 ingrats à la bonté infinie de nostre Sau-
 ueur, qui déploye toutes ses richesses &
 ses biens en cette table pour les nous di-
 stribuer. Car en se donnant à nous il nous
 rend témoignage que tout ce qu'il a est
 nostre. Pourtant receuons ce sacrement
 comme un gage que la vertu de sa mort
 & passion nous est imputée à iustice, tout
 ainsi que si nous l'auions soufferte en nos
 propres personnes. Que nous ne soyons
 point si peruers de nous reculer où Iesus
 Christ nous conuie si doucement par sa

66 *Antithese de la Messe,*
parole. Mais en reputant la dignité de
ce don precieux qu'il nous fait, presen-
tons nous à luy d'un zele ardent, afin
qu'il nous fasse capables de le recevoir.

Pour ce faire eleuons nos esprits &
nos cœurs en haut, où est Iesus Christ en
la gloire de son pere, & d'où nous l'at-
tendons à nostre redemption. Et ne nous
amusons point à ces elemens terriens &
corruptibles que nous voyons à l'œil, &
touchons à la main pour le chercher là,
comme s'il estoit enclos au pain ou au
vin. Car nos ames seront disposées à
estre nourries & viuifiées de sa substan-
ce, quand elles seront ainsi eleuées par
dessus toutes choses terrestres pour at-
teindre iusqu'au Ciel, & entrer au Roy-
aume de Dieu où il habite. Contentons-
nous donc d'auoir le pain & le vin pour
signes & témoignages, cherchant spiri-
tuellement la verité où la parole de Dieu

promet que nous la trouuerons. Ce fait le Ministre distribue le pain & la coupe au peuple.

Voilà le Formulaire de la Cene de Calvin, & tout ce qu'on y fait & dit, représenté par luy mesme, en ce qui est contenu depuis ces paroles, *la maniere de celebrer la Cene*, iusques à celles-là, *ce fait le Ministre distribue le pain & la coupe au peuple*, inclusiuement, qui est transcrit de mot à mot de leur Psautier. C'est ce que nous auons à considerer & à examiner, car ils n'y font ni n'y disent autre chose que ce qui est là représenté. Le Ministre Caluiniste commence par vn *Ecoutons*, monté sur sa chaire, & parlant au peuple de son auditoire. Il leur recite le texte de saint Paul en la 1. Cor. 11. sept versets depuis le 23. iusqu'au 29. inclusiuement, dont les trois premiers contiennent ce que Iesus a fait & commandé de faire, instituant sa sainte Cene avec ses Apostres, que les trois Euangelistes S. Matthieu, S. Marc & S. Luc representent fort succinctement,

dont il pourroit bien faire lecture comme du texte de S. Paul, & marquer les singularitez de chacun, pour prendre loy de ce qu'il faut faire. Mais ne voulant rien faire de ce que Iesus a fait & commandé de faire, autant vaut-il de lire le seul texte de S. Paul, comme celui des trois Euangelistes. Encore ne se contentant pas de ne rien faire de ce qui est porté par le texte de S. Paul que le Seigneur a fait & commandé de faire, ils ont mal traduit les paroles de Iesus Christ & celles de S. Paul, & à la fin mesme de leur legende, i'entens de leur Formulaire, ils contredisent à ce que Iesus Christ a prononcé.

Ils ont traduit εἰς τὴν ἀνάμνησιν, *en memoire de moy*, d'où ils pretendent tirer vne raison contre la presence du corps & du sang de Iesus Christ en la sainte Eucharistie, disant, qu'on ne fait pas memoire de ce qui est present, mais de ce qui est absent. A quoy nous répondons, que leur interpretation n'est pas bonne, & par consequent leur raison mal fondée. Il faut traduire εἰς τὴν ἐμνήν

ἀνάμνησις pour mon memorial. Ce terme que S. Paul adiousté aussi bien que S. Luc aux paroles de nostre Seigneur donnant son corps, est fort considerable. C'est pourquoy l'Apostre dit que Iesus le repete encore administrant la coupe, comme tres-important, pour faire entendre la nature de cet acte religieux, dont le Seigneur fait l'ordonnance, le ioignant à sa mort & à ses souffrances du mesme iour. Car le Seigneur institua sa Cene la nuit qu'il fut liuré, par laquelle les Iuifs commençoient leur iour civil, auquel il fut crucifié. Le Seigneur appelle cette institution, qui fait partie de son sacrifice *ἀνάμνησις*, d'un mot qui répond à l'Hebreu *Ziccharon*, *azchara*, *azcharatha*, souuent employez aux sacrifices Leuitiques, pour signifier ce qui estoit offert à Dieu, & mis sur les Autels d'or & d'airain. C'est ainsi qu'il se prend au liure du Leuitique chap. 2. 5. & 6. & au 24. où l'encens qui estoit sur les pains de proposition, qui estoit pris & mis au feu sur l'Autel d'or, est dit, *memorial, offrande faite par feu au Seigneur*,

70 *Antithese de la Messe,*

où les Septante employent le terme *αιδμνος*. De là vient que le Prophete Esaïe chap. 66. pour dire offrir l'encens use du verbe qui signifie faire memorial l'encens *mazchir lebonah*. Et qu'aux titres des Pseaumes 38. & 70. le Prophete employe le mesme verbe *lebazchir*, pour faire memorial, voulant dire, pour faire offrande, que le Grec a traduit εις αιδμνον. De sorte que les mots Grecs *anamnesis* & *mnemosynon*, qui répondent à l'Hebreu *ziccharon* & *azchara* signifient quelquefois oblation, offrande, & sont des termes pris des sacrifices, Ainsi se doit entendre le mot *ziccharon*, en l'Exode 30. vers. 16. pour vn sacrifice, vne oblation faite à Dieu pour le rendre propice, Ainsi peut-on entendre en S. Matthieu chap. 26. le terme de *mnemosynon*, où il est dit, qu'il se parlera de ce qu'auoit fait Marie la Religieuse sœur de Lazare comme d'un memorial, d'une oblation sainte qu'elle auoit faite à Dieu. Et aux Actes ch. 10. l'Ange dit à Corneille, tes prieres & tes aumosnes sont montées deuant Dieu.

comme vn memorial, *ἡς μνημόσυνον*. Iesus Christ donc veut dire vsant d'un terme pris des sacrifices, que ce que le memorial estoit aux sacrifices Leuitiques, la Cene qu'il instituait l'estoit à son sacrifice, pour l'offrir & représenter continuellement à Dieu, & deuant Dieu en son Eglise, & par son Eglise iusqu'à sa venue, ainsi que l'Apostre S. Paul l'interprete disant, Toutes les fois que vous mangerez de ce pain & boirez de ce calice, vous annoncez la mort du Seigneur iusqu'à ce qu'il vienne. Où ceux de Geneue ont mal traduit au temps futur, vous annoncerez, comme aussi Calvin en son Formulaire, au lieu que saint Paul dit au temps present vous annoncez, *καταγγέλλετε*. Comme Beze & Erasme ont bien obserué, qui traduisent *annunciatis*. Mais le Metaphraste Syriaque plus considerable que tous les deux, a vsé de cette circonspection, & s'est tenu à cette expression du temps present, dont l'Apostre a vsé pour nous enseigner que cette annunciation de la mort du Seigneur ne se fait pas tant par

la bouche de l'Eglise, ou de celuy qui administre le mystere, comme en vertu de l'action du mystere mesme, estant celebré suivant l'ordre & l'institution du Seigneur. Car dautant que la Cene du Seigneur est le memorial de sa mort, & que son corps y est mystiquement rompu & son sang répandu, en vertu de cet acte mystereux, la mort du Seigneur y est annoncée. Toutainsi que la mort de la victime l'estoit aux memoriaux & ceremonies des sacrifices, après l'immolation de la victime. Au lieu dequoy le Seigneur a subrogé, & substitué le saint Sacrement, pour y annoncer que nostre Pasque Christ a esté immolé pour nous. Pour y représenter & offrir à Dieu le corps de Iesus Christ encore rompu en son memorial, & son sang encore répandu en son memorial. Ce sang tout frais tué, tout recent, vivant, *αἷμα ζῶν*, comme parle l'Apostre aux Hebreux. Ce sang qui parle choses meilleures que le sang d'Abel. Ainsi la mort de Iesus Christ est-elle annoncée en l'Eucharistie par cela

mesme qui s'y fait , comme par le memorial qui la represente. Et aux especes du pain rompu , & du calice la mort du Seigneur, son corps rompu & son sang répandu, tels qu'ils estoient en la Croix, sont representez, sont mis deuant Dieu, & luy sont offerts. Et c'est proprement ce que l'Apostre signifie par ces paroles, *Vous annoncez la mort du Seigneur.* Il nous faut adiouster à cette obseruation pour la ratifier, & confirmer dauantage, le parallele que l'Apostre fait en l'Epistre aux Hebreux du sacrifice de Iesus Christ avec celuy du souuerain Sacrificateur vne fois l'an pour les pechez de tout le peuple, du bouc sur lequel le sort du Seigneur estoit venu. Le souuerain Pontife en portoit le sang dans le lieu tres-saint, le dixième iour du mois Thifri. Ainsi, ce dit l'Apostre, Iesus est-il entré dedans le Ciel par son propre sang, lequel il offre à Dieu continuellement intercedant pour son Eglise. Or tout de mesme que le souuerain Pontife estant dedans le lieu tres-saint, offrant le sang, tant du bouueau pour

74 *Antithese de la Messe,*

foy-mesme, que du bouc pour tout le peuple, les autres Sacrificateurs mettoient dessus l'Autel d'airain toute la graisse du bouveau & du bouc avec farine, huile, sel, encens, & l'effusion du vin, qui estoit le memorial ioint à ces sacrifices, ainsi qu'on le peut recueillir des 2. 3. 4. 7. 9. 16. chapitres du Leuitique, & 15. des Nombres. De mesme nostre souuerain Pontife estant dedans le Ciel, offrant à Dieu continuellement son sang, ceux qu'il a establis en terre en son paruis, offrent à Dieu continuellement le memorial du grand sacrifice propiciatoire, avec lequel & par lequel ils presentent à Dieu l'encens de leurs prieres & de leurs actions de graces. Et ce memorial institué par Iesus Christ est necessairement ioint à son sacrifice. Calvin donc & ses disciples, faute d'intelligence de ce mystere, ont mal mis le mot de memoire au lieu de memorial.

Disons encore qu'ils ont mal traduit, τοῦτο τὸ ποτήριον ἡ καινὴ διαθήκη ἐν τῷ αἵματί μου. *Cette coupe est le nouveau Testa-*

ment en mon sang. Premièrement le mot de coupe n'est pas si propre que celui de calice, qui se prend, tant pour le breuvage que pour le vase, comme *pusculum* en Latin, & *ποτήριον* en Grec. signifient l'un & l'autre. Toutefois cela est peu de chose. Quelqu'un d'entre eux s'en est avisé, & a fait changer aux dernières éditions de leur Formulaire, & mettre calice. Mais le mot de testament n'est nullement convenable en ce lieu - cy, où il ne s'agit pas d'un testament, c'est une alliance. Cette alliance, de laquelle le Prophète Jérémie parle au 31. & 32. chap. cité par l'Apostre en l'Épître aux Hébr. Le terme Hébreu *berith*, employé par le Prophète, que le traducteur de S. Matthieu en Hébreu a aussi employé, ne signifie pas testament, mais alliance. Aussi ceux de Genève en leur version de Jérémie l'ont traduit alliance. Et ils ont été si peu avisés qu'en l'Épître aux Hébreux au lieu d'alliance, ils ont mis par tout, testament. Et en l'institution de la sainte Cène aux paroles de notre Seigneur,

ils interpretent *Ἀγθίνην* par testament. Comme aussi en leur Formulaire, où ils s'en pouvoient & deuoient dispenser. Il faut oster par tout ce mot de testament, qui au lieu de faire entendre le texte de la sainte Ecriture, l'obscurcit. Nous en rendons raison en vne exposition que nous auons fait & donné au public, sur les 16. 17. 18. versets du chap. 9. de l'Epistre aux Hebreux.

Mais tout cela n'est pas si considerable comme la conclusion de leur Formulaire, par laquelle ils contredisent aux paroles tres-expresses de nostre Sauueur, qui après auoir rendu graces & beni le pain & le calice, disant à ses Apostres, prenez, mangez, buuez, prononce que ce qu'il leur donne, & ce qu'ils reçoient de sa main, qu'ils doiuent manger & boire, est son corps rompu, & son sang répandu, τοῦτο ἔστι τὸ σῶμα μου, τοῦτο ἔστι τὸ αἷμα μου. Et celuy qui a mis l'Euangile de S. Matthieu en Hebreu l'a tres-bien exprimé, *Ze hu guphi ze hu dami, hoc ipsum est corpus meum, hoc ipsum est sanguis meus.* C'est à dire, cecy mesme est

mon corps, cecy mesme est mon sang.
Eux au contraire disent,

Ne nous amusons point à ces elemens terriens & corruptibles que nous voyons à l'œil & touchons à la main, pour le chercher là, comme s'il estoit enclos au pain ou au vin. Car lors nos ames seront disposées à estre nourries & viuifiées de sa substance quand elles seront éleuées par dessus toutes choses terrestres, pour atteindre iusqu'au Ciel, & entrer au Royaume de Dieu où il habite. Contention-nous donc d'auoir le pain & le vin, pour signes & témoignages, cherchant spirituellement la verité, où la parole de Dieu promet que nous la trouuerons.

C'est leur langage tout contraire à celuy de Iesus Christ. Car celuy de nostre Seigneur porte que ce qu'il donne de sa main à ses Apostres, ce qu'il leur recommande de receuoir, de manger, & de boire, est son propre corps rompu & son

sang répandu. Aucun bon Chrestien ne niera que le corps rompu de Iesus Christ & son sang répandu ne soit la verité du Sacrement : Or Iesus Christ dit, cecy est mon corps rompu & mon sang répandu. On ne doit donc pas chercher la verité ailleurs qu'aux paroles de Iesus Christ, qui portent que c'est son corps rompu, & son sang répandu. Et ils disent que ce ne sont que des signes, & qu'il faut chercher la verité ailleurs. Il les faut prendre au mot, ils ont raison, il faut chercher la verité ailleurs qu'en leur Cene, en laquelle il n'y a que des faux signes, qu'une vaine apparence de la Cene du Seigneur, point de realité, point de verité. Car où il n'y a point de benediction, point de consecration, point d'actions de graces, la Cene de Iesus Christ n'y est point : Ce ne peut estre un Sacrement. Ils disent vray qu'en leur Cene le pain & le vin ne sont point faits le corps & sang de Christ. Car il n'y a en leur Cene, ni actions de graces, ni benediction, ni consecration. Ils y lisent ce que Iesus

Christ a fait & a dit, ainsi que S. Paul le rapporte, mais ils n'en font rien du tout. Après auoir recité le texte de S. Paul, & auoir dit, *Ecoutons comme nostre Seigneur Iesus Christ nous a institué sa sainte Cene*, ne falloit-il pas faire ce qu'il commande, ce qu'il a fait? prendre le pain & le vin & rendre graces, les benir & les consacrer, afin qu'ils fussent le corps & le sang de Christ pour y participer? Au lieu de cela qu'est-ce qu'ils font? Ils excommunient. C'est à dire qu'au lieu de benir ils maudissent. Car excommunier c'est anathematiser, & anathematiser c'est maudire. Mais encore qui excommunient-ils? Generalement tous les pecheurs. Tous ceux qui contreuient aux commandemens de Dieu, tant de la premiere que de la seconde table de la Loy: *Idolâtres, blasphémateurs, contempteurs de Dieu & tous Heretiques*. Ce sont ceux qui violent les commandemens de la premiere table. Après ceux-là ils mettent les *rebelles à pere & à mere & à leurs superieurs, batteurs, adulteres, paillards, larrons, pariu-*

res, auaricieux, qui font contre les commandemens de la seconde table. Ils ne se contentent pas d'exprimer les grands pecheurs, ils y ont adiousté les noïseux & les gourmans. Afin que vous sçachiez qu'ils excommunient tous les pecheurs tant petits que grands. S'ils se fussent contentez de coter les pechez qui crient, les pechez enormes, qui sont dignes d'anatheme, & d'excommunication. S'ils eussent enoncé les Sorciers, Magiciens, Athées, Profanes, Impies, Parricides, Faux-monoyeurs, Sodomites, Incestueux, Meurtriers, Faux-témoins, Simoniaques, Incendiaires, Sacrileges. Ils n'expriment aucun de tous ceux-là qui sont criminels de crimes capitaux, punissables de griefs supplices par les loix diuines & humaines, & excommunient tous les pecheurs, & s'excommunient eux-mesmes.

Quand ils disent, *les Heretiques & tous ceux qui font sectes à part, pour rompre l'unité de l'Eglise*, sans les particulariser, sans doute qu'ils entendent les Artiens, Anabaptistes, Sociniens, & peut-estre
tous

tous les Anglois qui sont diuisez en plusieurs sectes. Mais ils sont eux-mêmes des premiers Heretiques & Schismatiques de ce siecle, qui ont fait secte à part pour rompre l'vnité del'Eglise. Ils se décriuent & décrient eux-mêmes. Je vous prie, qui sont les rebelles à leurs Superieurs, s'ils ne le sont point? Ayant si souuent pris les armes contre le Roy. Témoins leurs mouuemens des années 1622. 25. & 27. sans parler des autres. Contre lesquels leur Academie de Nîmes a composé vn fort bon liure, De l'obeïssance des Chrestiens enuers leurs Magistrats & Pînces souuerains. Et qui sont ceux-là qui ont fait couper la teste à leur Roy? Ne sont-ce pas les Puritains & Caluinistes d'Angleterre? Mais leur principale excommunication n'est pas celle qu'ils prononcent, qui fait contre eux, & par laquelle ils se font leur procès. C'est celle qu'ils operent par l'abolition de la Messe, par l'aueantissement de la sainte Cene du Seigneur parmy eux. Car ayant quitté la Messe, & ayant renoncé à la Messe, ayant aboli

la Cene du Seigneur entre eux, ne se sont-ils pas effectiuement excommuniez? Ils ont détruit tant qu'ils ont peu la Synaxe, la communion de l'Eglise, de laquelle ils se sont priuez & retranchez.

Leur excommunication encore n'est-elle pas bien fondée? Iesus Christ a fait sa Cene entre ses Disciples, donc il en a excommunié tous les autres. La consequence n'est pas bonne. Premièrement Iesus Christ n'a pas fait la Cene avec tous ses Disciples. Car les septante Disciples qu'il enuoya deux à deux n'y estoient pas. Il n'y auoit que les douze Apostres, S. Marc & S. Luc, qui estoient des Disciples de Iesus. Ioseph d'Arimatee, Nicodeme, Nathanael qui en estoient aussi, n'estoient pas à sa Cene. Ni la sainte Vierge sa Mere, ni Marie de Cleopas, ni Marie Magdelene, ni celles qui l'auoient suiui de Galilée, ni Lazare avec ses sœurs Marthe & Marie, qui l'auoient festiné deux jours auparavant, chez Simon le Lepreux en Bethanie, n'assisterent pas à la Cene du Sei-

gneur. Ils n'en furent pas pourtant excommuniiez. Mais comment en auroit-il excommunié tant de fideles, que Iudas l'infidele, le traïstre, n'en fut pas excommunié, à ce qu'ils disent en leur Catechisme au dernier Dimanche, qui est le 55. que nostre Seigneur y a bien receu Iudas quelque méchant qu'il fust. Ce qui toutefois n'est pas vray, selon mon sentiment. Car saint Iean dit, qu'aussi-tost que Iudas eut receu le morceau trempé il sortit. Et ce fut deuant que Iesus benit le pain & le vin, & donna son corps & son sang. Comme Beze mesme le reconnoist & l'auouë. Mais encore que Iudas ne communia pas, Iesus Christ ne l'auoit point excommunié. Il sortit de son mouuement, Satan estant entré en luy. Et Iesus Christ par sa prouidence attendit qu'il fust sorti, auant qu'instituer le S. Sacrement de l'Eucharistie. Il est bien vray qu'anciennement deuant la Communion & la Consécration, deuant que commencer la Liturgie, & qu'administrer le S. Sacrement, on donnoit congé aux Ca-

techumenes, on disoit à ceux qui n'auoient pas encore receu le S. Baptesme de se retirer. Mais ce n'estoit pas par excommunication. L'excommunication se faisoit à vne autre heure & d'une autre façon. Il y en auoit de trois sortes, la petite, la moyenne, & la grande. La premiere s'appelloit en Hebreu *niddui*, la seconde *herem*, la troisième *sematha*, ou *maranatha*. Cette grande excommunication, dont S. Paul dit en la premiere aux Corinthiens chap. 5. contre l'incestueux qui auoit pris la femme de son pere en l'Eglise de Corinthe, qu'il auoit condamné & qu'il condamnoit vn tel homme au nom & en l'autorité de nôtre Seigneur Iesus Christ, d'estre liuré à Satan, pour la destruction de la chair, afin de sauuer son ame en la iournée du Seigneur Iesus. Cette iournée de laquelle parle l'Apostre saint Iude en sa *Catholique*, rapportant la prophetie d'Enoch, qui est la grande excommunication, l'anatheme Maranatha contre les impies de son temps, *Voicy le Seigneur viendra avec les milliers de*

ses Saints, pour faire iugement, pour reprendre & punir les impies de toutes leurs impietez & de leurs blasphemes. Mais ceux qui auoient esté excommuniez de l'Anatheme Maranatha n'entroient pas mesme dans l'Eglise, témoin ce Bilius Sophiste de Constantinople, lequel estant couché par terre à la porte de l'Eglise, crioit *πατήσατέ με τὸ ἄλας τὸ αἰαίοθητον.*

Calcate me sal insipidum, foulez-moy à vos pieds qui suis sel sans saueur. Ainsi que rapporte Socrate liure troisiéme chapitre 13. Quand il se faut approcher de cette sainte table, de cet Autel, il n'est pas à propos d'excommunier par vne longue legende toutes sortes de pecheurs & de malfaiteurs, où sont compris, selon le langage du Formulaire Calvinien, tous les assistans. Il suffit de dire & d'aduertir que ceux qui ne sont point baptisez, ceux qui ne sont point admis à la Communion, & participation du saint Sacrement se retirent. *ἐκὼς ἐκὼς ὅσις ἀλιπεὶς, Procul ô procul este profani.* Et en l'Eglise Catholique Romaine il n'est point besoin de le dire.

Car nul ne communie qu'il n'ait esté examiné & admis, qu'il ne se soit confessé à vn Confesseur, qu'il n'ait eu l'absolution, & que celui qui administre le Sacrement ne soit aduerti, tant l'ordre y est exact & excellent. Mais Calvin avant l'administration de sa Cene fait excommunier tous ses adherans. Toutefois ce n'est que pour leur donner l'épouuante : car il les amadouë & les flatte puis après. Il leur donne courage. Les ayant effarouchez, il les rappelle, & les exhorte de reuenir. *Encore qu'ils sentent en eux beaucoup de fragilité & de misere, comme de n'auoir point la foy parfaite, qu'ils ne soient point si adonnez à seruir Dieu, ni d'un tel zele qu'ils deuroient, leurs vices & leurs imperfections, ce dit-il, n'empêcheront point qu'ils ne soient receus à cette table spirituelle.* Je ne sçay pas comment il l'entend, si c'est de sa table, ie luy accorde que les vices & imperfections, l'incrédulité, & la défiance n'empêcheront pas qu'ils n'y soient receus, & qu'ils n'y aient leur part. Mais si par la table spirituelle, il entend le saint Sacrement de

la Cene du Seigneur, deuëment administré en l'Eglise de Dieu, on n'y doit point admettre les vicieux & imparfaits, les incredules & défiants. Et encore moins sont-ils receus à la participation salutaire du corps & du sang de Iesus-Christ, qui ne se fait que par la vraye foy, qui n'est que pour les parfaits, comme nous enseigne l'Apostre aux Hebreux chap. 10. προσερχόμεθα μετὰ ἀληθινῆς καρδίας ἐν πληροφορίᾳ πίστεως ἐρρασιμμένοι καρδίας ἀπὸ συνειδήσεως ποιηθεῖς. C'est à dire, *approchons-nous avec un cœur sincere & certitude de foy, ayant les cœurs repurgez d'une mauuaise conscience.* Et au chap. 25. vers. 14. τελείων ὅτι περὶ τροφῆς. C'est à dire, *la nourriture solide est pour les parfaits*, & au 6. vers. 1. εἰς τὴν τελειότητα φερόμεθα, c'est à dire, *allons à la perfection*, & nostre Seigneur en saint Matth. 5. 48. ἔσθε τέλειοι. c'est à dire, *soyez parfaits*. Et en la premiere Cor. 2. 6. σοφίαι λαλοῦμεν ἐν τοῖς τέλειοις. c'est à dire, *nous parlons de la sapience entre les parfaits*. & au 14. 20. ταῖς φρεσὶ τέλειοι γίνεσθε. c'est à dire, *soyez parfaits d'intel-*

*ligence, ou en bon sens. Et en l'Epistre aux Philippiens 3. 15. ὅσσοι οὐκ τέλειοι τῷ το φρονεῖτε. C'est à dire, nous tous qui sommes parfaits ayons ce sentiment. Par où on peut reconnoître l'impertinence du langage des Sectaires de Calvin & l'absurdité de leur doctrine. Car par cette table spirituelle ils signifient la spirituelle & veritable & salutaire communion au corps & au sang de Iesus Christ, qui se fait par l'extase & l'élévation de la foy, dont parle l'Apostre Col. 3. 1. τὰ ἄνω ζητεῖτε οὐδ' ὁ Χριστός ἐστὶν ἐν δεξιᾷ τοῦ Θεοῦ κατήμενος, τὰ ἄνω φρονεῖτε, μὴ τὰ ἐπὶ τῆς γῆς. C'est à dire, cherchez les choses d'en-haut où Christ est assis à la dextre de Dieu. Pensez aux choses d'en-haut, & non pas aux terrestres. C'est ce que l'Eglise entend quand on dit à la Messe, *Sursum corda.* A quoy il est répondu, *Habemus ad Dominum.* Que Calvin & ses adherans ont voulu contrefaire en leur Formulaire, quand ils parlent d'eleuer leurs cœurs en haut, de ne se point amuser aux elements terriens & corruptibles, ils veulent dire aux Sacremens qu'ils voyent &*

qu'ils touchent , mais de chercher spirituellement la verité , où la parole de Dieu promet qu'ils la trouueront. Ils veulent dire au Ciel, où est Iesus Christ. Car ils ne tiennent pas que le corps & le sang du Seigneur soient presens au S. Sacrement, Desorte qu'ils font deux tables , l'vne spirituelle & celeste , où il faut chercher la verité ; l'autre est charnelle & terrestre des elemens terriens & corruptibles qu'on voit à l'œil & qu'on touche à la main , à quoy il ne se faut pas amuser. C'est leur langage , qui n'est pas conforme à celuy des saints Euan-gelistes , ni de S. Paul , ni de l'Eglise Catholique, de laquelle nous auons appris que ceux qui ont écrit les saints Euan-giles & autres liures de la nouvelle Alliance ont esté inspirez de Dieu. Et ces liures là nous enseignent que Iesus institua le saint Sacrement de sa Cene en rendant graces, en benissant, en consacrant le pain & le vin, & les faisant son corps & son sang, comme il le prononce, Cecy est mon corps rompu, & mon sang répandu. Ce qu'il leur donnoit,

qu'ils voyoient, qu'ils touchoient, qu'ils prirent, & qu'ils mangerent. Il appelle cette institution, son memorial, & commande de faire comme il a fait. S. Paul a appelé cette table que nous voyons à l'œil, & touchons à la main, le calice de benediction que nous benifions, le pain que nous rompons, communion du sang de Christ, communion de son corps. Il nomme ce que nous voyons & touchons, le calice du Seigneur, la table du Seigneur, la Cene du Seigneur, la nouvelle Alliance par son sang. Dit qu'en la celebrant on annonce la mort du Seigneur iusqu'à ce qu'il vienne. Que celui qui en mange & en boit indignement est coupable du corps & du sang du Seigneur; qu'il reçoit sa condamnation, *μὴ Ἀγχιπῶν τὸ σῶμα τοῦ κυρίου, ne rendant pas au corps du Seigneur l'honneur qui luy est deu.* Oū le bienheureux Apostre entend par le corps du Seigneur le saint Sacrement, qu'il veut que l'on honore & que l'on reuere comme estant le corps du Seigneur, employant le mot *Ἀγχιπῶν*, qui répond

au verbe Hebreu *habdil*, que Moyse employe au 10. chapitre du Leuit. enseignant au Sacrificateur avec quel respect & veneration il deuoit venir dans le Tabernacle sacré, *lehabdil ben hakodesch vben habol*. Iunius & Tremellius ont traduit *ad discernendum*, en Grec on pourroit interpreter *αὐτὸ ἀκριβῶς*, pour *discerner*. L'Apôstre donc vsant de ce terme, que ceux qui ne rendent point au saint Sacrement l'honneur & la reuerence qu'on doit au corps du Seigneur, attirent sur eux le iugement de Dieu, & leur condamnation. Calvin au contraire dit en son beau Formulaire, qu'il ne se faut point amuser aux elemens terriens & corruptibles que nous voyons à l'œil & touchons à la main. Voilà comme il s'accorde avec la verité de la Religion que S. Paul nous enseigne & nous recommande, & que les bons Catholiques obseruent avec tout le respect & la deuotion qu'il leur est possible. Quant à la Cene de Calvin, ie trouue qu'il a raison de dire qu'il ne se faut point amuser au pain & au vin qui s'y donne. Car à vray

dire, sa Cene n'est qu'un amusement & qu'un abus. Ce n'est que du pain & du vin profane. N'y ayant point de consecration, point de benediction, point d'actions de graces en sa Cene, comme il conste par ce qui s'y pratique d'ordinaire, selon ce qu'il en a ordonné par son Formulaire. Car après la lecture de ce Formulaire, sur lequel nous venons de faire quelques remarques, qu'est-ce que fait le Ministre? rien de ce qu'il a dit qu'il falloit faire. Il descend de sa chaire, il vient à la table où est le pain & le vin, prend du pain & le mange, la coupe ou le verre & boit du vin qu'on luy a versé, sans autre ceremonie, sans faire aucune action de graces, aucune benediction, aucune consecration. & en donne puis après tout de mesme à ses Anciens, & à tout le peuple, qui vient là à la file, & en passant prend vn morceau de pain & boit vn peu de vin, qui n'ont point esté presentez à Dieu, dont on ne luy a point rendu graces, qu'on n'a point beni, qu'on n'a point consacré. Tellement que le pain & le

vin & la viande qu'ils mangent & boivent à leurs repas ordinaires, est plus sainte que n'est leur Cene. Car avant que disner & que souper chez eux, ils font vne priere à Dieu, qu'il luy plaise benir & santifier les viandes qu'ils prennent pour la nourriture de leurs corps. Et Calvin & ses Disciples n'ont point eu l'auisement ni le courage de faire vne priere à Dieu, à ce qu'il luy pleust benir & santifier ce pain & ce vin pour la nourriture de leur ame. S'ils ne vouloient faire vne Liturgie toute entiere, comme l'ordinaire de l'Eglise Romaine, ou les anciennes, ou modernes, que nous auons des Grecs & autres Chrétiens. Au moins prenant le pain & le calice deuroient-ils rendre graces à Dieu qui nous donne les fruits de la terre, qui les a ordonnez pour nostre nourriture, qui a voulu qu'ils ayent esté employez anciennement aux sacrifices Leuitiques pour les santifier & consacrer: Mais qui a voulu qu'ils ayent esté employez sous la nouvelle Alliance au sacrifice des sacrifices, au memorial du

sacrifice de Iesus Christ son fils, lequel en la nuit qu'il fut liuré prit le pain & le calice, les offrit à Dieu luy rendant graces, & les benissant auant que les donner à ses Apostres, leur commandant de faire comme luy. Et en obeissant à ce commandement les offrit à Dieu, luy demander qu'il luy plaise les benir & consacrer, & les faire estre le corps & le sang de son fils, selon qu'il le prononça les donnant à ses Apostres, & finir l'action de graces par les paroles de nostre Seigneur, rapportées par les Euangelistes & par S. Paul, Cecy est mon corps rompu & mon sang répandu de la nouvelle Alliance, ou la nouvelle Alliance par mon sang; qui font la consecration du pain & du calice, & qui declarent la volonté de Iesus Christ comme vn arrest. Et consequemment offrant à Dieu ce pain & ce vin consacrez, & faits le corps & le sang de Iesus Christ, c'est à dire en offrant le corps & le sang de Iesus Christ, son corps rompu & son sang répandu en la Croix, qui est tousiours recent, tousiours vi-

uant deuant luy pour la propiciation de nos pechez, & de ceux-là que nous recommandons à Dieu par nos prieres, d'estre appaisé enuers nous & enuers eux, pour l'amour de Iesus, & de nous oëtroyer toutes sortes de benedictions. C'est ce chemin duquel parle l'Apostre en l'Epistre aux Hebreux 10. par lequel nous auons entrée dans les lieux saints, εἰσόδον τῆς ἀγίας ἐν τοῦ αἵματι Ἰησοῦ ἣν ἐνεχαίνισεν ἡμῖν ὁδοῦν πρόσφατον καὶ ζῶσαν διὰ τῆς καταπετάσματος, τῆς τ' ὅσῃ τῆς σαρκὸς αὐτοῦ. c'est à dire, *par le sang de Iesus, le nouveau chemin qu'il nous a fait tout frais, tué, viuant*, par le voile dit en Hebreu *parocheth*, à sçauoir sa chair. Car ce voile estoit vne figure de sa chair. C'est pourquoy il se fendit, sa chair estant ouuerte sur la Croix, par les playes de ses mains, de ses pieds, & de son costé. L'Apostre nous enseigne en ce lieu-là tres-excellent, que non seulement Iesus est entré dans le lieu tres-saint par son propre sang, par sa mort, comme souuerain Sacrificateur, mais qu'il en a aussi donné l'entrée aux fideles, qui par le sang de

Iesus, par sa chair, par son corps rompu ont accès à Dieu pour luy offrir ce corps & ce sang, ce sacrifice propitiatoire, & par ce sacrifice propitiatoire leurs prieres & leurs actions de graces. C'est ce que Iesus nous a enseigné & commandé de faire. C'est ce qui se fait, & qui se pratique en la Messe. Ce que Calvin deteste & a en execration; contre quoy il vomit des horribles blasphemes. Qu'il a aboli tant qu'il a pû en sa Cene. Où il dit bien ce que Iesus a fait; mais il n'en fait rien. Au lieu de le faire il fait vne algarade, vne boutade, vne excommunication temeraire; & puis il reblandit ceux à qui il a fait cette rodomontade, il leur donne vn morceau de pain, vne goutte de vin sans les benir & consacrer. N'est-ce pas se moquer de Dieu & des hommes? Voilà la belle Cene de Calvin; qui a aboli, comme il parle parmy ses Sectateurs, la Messe, c'est à dire la sainte Cene du Seigneur, & quant aux circonstances, & quant à l'essence, ayant supprimé toute consecration, par laquelle le pain & le
vin

vin sont faits le corps & le sang du Seigneur. Se faut-il estonner s'ils ne le discernent point? S'ils en ont banni le culte religieux, la veneration, l'adoration qui est deuë au corps & au sang du Seigneur, puisque ce ne l'est point? N'est-ce pas vne chose honteuse, qu'au lieu d'estre à genoux dans la communion de l'Eglise, sinon tous les iours, au moins tous les Dimanches, pour annoncer la mort du Seigneur; offrir à Dieu les vœux & les actions de graces, & les prieres par Iesus Christ crucifié, dont le memorial est celebré continuellement en l'Eglise Chrestienne, la Pasque, la Victime, l'Agneau comme occis représenté, offert, ce sang tout frais, tout fumant mis deuant Dieu, par lequel les fideles s'approchent du trône de grace, ont l'entrée du lieu tres-saint; de les voir quatre fois l'année pour le plus, aller à la file l'un après l'autre tous debout, tout passant, prendre vn morceau de pain, & vn peu de vin sans benediction, sans consecration, indeuotement, irreligieusement, & vouloir faire croire au

G

CHAPITRE VI.

*De l'adoration & du culte qu'il faut
 rendre au corps & au sang de Iesus
 Christ en la sainte Eucharistie.*



CONSIDERONS à l'oppo-
 site, avec quelle deuotion,
 quelle veneration, quelle
 religion, quelle adoration
 le peuple Chrestien assiste
 à la Messe, qui est la sainte Cene du Sei-
 gneur. Ce que les Aduersaires repro-
 chent aux Catholiques, & qu'ils leur im-
 properent comme vne idolatrie. Au lieu
 de se reconnoistre eux-mesmes double-
 ment coupables. Premièrement de ne
 point adorer le corps & le sang de Iesus
 Christ presens en la sainte Cene spiri-
 tuellement, mystiquement, & sacra-
 mentellement selon leur propre confes-
 sion. Après ils sont coupables de subro-

ger au lieu du corps & du sang de Christ du pain & du vin communs, profanes, sans aucune consecration, sans auoir imploré la grace & la vertu du S. Esprit pour les santifier, & pour les faire estre ce que Iesus a prononcé, son corps rompu, & son sang répandu. Et puis encore ils se découurent la teste, & font la reuerence à du pain & à du vin communs, & les adorent: puisqu'ils les prennent, les baissent, les mangent, comme les sacrements du corps & du sang du Seigneur. Et toutefois ce n'est que du pain & du vin qu'ils n'ont point présenté à Dieu, sur lequel on n'a fait aucune inuocation, ni priere, ni consecration. Qui par consequent ne doit estre censé, ni tenu pour Sacrement. Mais quelle audace d'inuestiuer contre l'Eglise Romaine à cause de l'honneur qu'elle rend au S. Sacrement? & qu'elle y adoré le corps & le sang de Christ? Et quoy, ne faut-il pas adorer le corps & le sang de Iesus Christ à cause de leur subsistence en la personne du Verbe? Il n'y a que les Arriens & Samosateniens anciens

Heretiques, & les Sociniens modernes, contemporains aux Protestans & Pretendus Reformez, qui nient l'identité d'essence du Pere & du Fils, la coëternité & égalité des personnes, qui denient à Iesus Christ l'adoration de Latrie: Mais les Protestans, Lutheriens & Pretendus Reformez s'accordent avec les Catholiques Romains Orthodoxes, qu'il faut adorer la sacrée sainte humanité de Iesus Christ, de l'adoration deuë à vn seul Dieu Pere, Fils & S. Esprit, à cause de la subsistence de cette nature humaine en la personne du Verbe, qui l'a vnée à soy, comme saint Iean l'enseigne, la parole a esté faite chair, ὁ λόγος σὰρξ ἐγένετο. Ce que le Verbe a vne fois vni à soy hypostatiquement n'en a iamais esté séparé, non pas même par la mort. Qui a bien séparé l'ame du corps de Christ, quand il la remit entre les mains de son Pere, iusqu'à ce qu'il la reprit au moment de sa resurrection. Estant expiré en la Croix, son corps est demeuré inanime au Sepulchre. Mais ce corps & cette ame

font demeurez vnis à la personne du Verbe. Et à cause de cette vnion inseparable, l'ame remise entre les mains de Dieu est adorable, & le corps l'est aussi en la Croix, & au Sepulchre. Ainsi que ce corps & cette ame vnis en la conception, durant la vie de Iesus Christ, après sa Resurrection, en la terre, au Ciel, ont esté adorez, le doiuent estre, & le seront eternellement. La sainte Vierge ne faisoit que de le conceuoir quand elle alla voir Elisabeth sa cousine. L'ayant saluée, Iean Baptiste entressaillit de ioye au ventre de sa mere, & l'adora. A sa natiuité les Anges, & les Saints de l'armée celeste chanterent le Cantique de resiouissance en le reconnoissant & l'adorant par la bouche de l'Ange, comme leur Seigneur, accomplissant ce que l'Apostre dit au commencement de l'Epistre aux Hebreux, ὅταν εἰσαγάγῃ τὸν πρωτότοκον εἰς τὴν οἰκουμένην λέγει, καὶ προσκυνησάτωσαν αὐτῷ πάντες ἄγγελοι Θεοῦ. C'est à dire, *qu'introduisant le premier né en la terre il dit, & que tous les Anges de Dieu*

l'adorent. Les Mages vinrent d'Orient en Ierusalem, & de Ierusalem en Beth-lehem, & l'y trouuerent allaitant sa Mere, & l'adorerent. Durant sa vie il a receu & approuué l'adoration de la pechereffe prosternée à ses pieds chez Simon le Pharisien: Du Samaritain l'un des dix Lepreux qu'il guerit, qui reuint seul luy faire hommage : De l'Aueugle né, auquel il rendit la veuë avec de la bouë : De tout le peuple à son entrée dans Ierusalem, qui luy cria *hosanna*; De Marie la sœur du Lazare, qui l'adora oignant ses pieds chez Simon le Lepreux : Du brigand en la Croix, qui l'inuoquant le reconnoist pour son Seigneur : & après sa Resurrection, de tous ses Apostres. Mais quand il dit à ses Apostres & en leurs personnes à toute l'Eglise, Vous croyez en Dieu, croyez aussi en moy, en saint Iean 14. N'est-ce pas vn commandement de l'adorer en sa nature humaine, puisqu'en sa bien-heureuse humanité il est l'obiet de nostre foy, & l'auteur de nostre salut, en qui nous deuons mettre nostre confiance ? Et n'est-ce pas

l'obiet, l'appuy, le fondement de nostre Foy, représenté en la seconde partie du Symbole, Je croy en Iesus Christ son Fils, conçu du S. Esprit, né de la Vierge Marie, qui a souffert sous Ponce Pilate, a esté crucifié, mort, enseveli, ressuscité, monté au Ciel, d'où il viendra iuger les viuans & les morts ? Or il faut adorer celuy en qui on croit. Nous croyons en Iesus Christ conçu du S. Esprit, né de la Vierge, qui a souffert sous Ponce Pilate, mort, enseveli, ressuscité. Et donc il le faut adorer, considéré en tous ces termes là. Si nous croyons ce qu'il a prononcé, instituant la sainte Cene, Cccy est mon corps rompu, & mon sang répandu. Il le faut aussi adorer au S. Sacrement. Car il faut adorer le corps de Iesus Christ rompu, & son sang répandu, qui est signifié, qui est représenté, qui est donné au S. Sacrement de l'Autel. Et nul ne le reçoit salutairement, nul n'a communion avec luy qui ne l'ait adoré. S. Iean nous represente au 5. de l'Apocalypse, qu'il vit l'Agneau comme occis se tenant au milieu d'un trône, & adiouste

que les quatre animaux & les vingt-quatre Anciens, c'est à dire toute l'Eglise triomphante se prosterne & adore l'Agneau comme occis. On sçait ce que Iesus Christ dit à S. Iean au commencement de l'Apocalypse, Je suis le premier & le dernier, & le vivant. J'ay esté mort, & ie suis vivant és siecles des siecles. Iesus Christ est effectiuement, reellement, veritablement resuscité des morts, vivant dedans le Ciel, & ne meurt plus. Mais il est représenté comme occis, comme mort. Les Anges & les Saints qui font l'Eglise triomphante, l'adorent y estant ainsi représenté. Calvin ni ses Sectaires les Pretendus Reformez ne peuuent pas nier que Iesus Christ ne soit représenté au saint Sacrement de l'Eucharistie, en la Cene, comme mort, qu'il n'y soit l'Agneau comme occis. Et n'est-ce pas vne irreligion, vne irreuerence, condamnée par l'exemple des Anges & des Saints de ne l'y point adorer ? On peut bien dire encore que cette vision de l'Agneau comme occis élevée sur vn trône, adoré par les qua-

tre animaux & les vingt-quatre Anciens, est vne prophetie de cela mesme, que l'Eglise Chrestienne a fait aussi-tost qu'elle a eu quelque prosperité. Car les anciens ont expliqué les quatre animaux, & les vingt-quatre Anciens, des quatre Euangiles, des liures de la nouvelle Alliance, & de ceux de l'ancienne, dont on a tousiours fait & fait-on encore lecture en la Messe, où l'Agneau comme occis est releué sur vn trône. Car ce qu'on appelle des Autels proprement sont des trônes, sur lesquels l'Eglise releue & adore l'Agneau comme occis, Iesus Christ crucifié qu'elle y represente, tant au saint Sacrement, qu'en la Croix qu'elle y pose tout au dessus, mettant au pied de la Croix de Iesus Christ tous les ornemens qui luy sont possibles, faisant sa gloire de l'opprobre de Christ, dequoy les Aduersaires se moquent. Nous en auons parlé au chapitre troisieme precedent, traitant du lieu où se celebre la Cene du Seigneur. Mais les Lutheriens qui les premiers s'en sont pris au sacrifice de

la Messe, & qui ont voulu mettre en compromis la Religion Chrestienne, l'adoration que l'Eglise rend au S. Sacrement de l'Autel, n'ont osé nier qu'il n'y faille adorer le corps & le sang de Iesus Christ. Témoin Chemnice leur grand Docteur, qui a écrit contre le Concile de Trente. Nous rapporterons ses propres termes: Voicy ce qu'il en dit au ch. 5. du S. Sacrement de l'Eucharistie.

De cultu & veneratione adhibenda huic Sacramento. Quædam extra controversiam sunt, quæ non inuitus concedo. Nam Christum Deum & hominem esse adorandum, nemo nisi Arrianus negat. Equidem humanam eius etiam naturam propter unionem cum diuinitate esse adorandam, nemo nisi Nestorianus in dubium vocat. Cum enim Pater æternus primogenitum introduceret in orbem terrarum, dicit, & adorent eum omnes Angeli. Sicut & Matthæus manifestè testatur cap. 28. Apostolos in Galilæa Chri-

stum adorasse, &c. Rectè igitur Augustinus in Ps. 98. disputans cum terra sit scabellum pedum Domini quomodo psalmus dicat, adorete scabellum pedum eius, quoniam sanctum est, inquit, conuerto me ad Christum, quia ipsum quero. Hic inuenio quomodo sine impietate adoretur terra scabellum pedum Domini. Suscepit enim de terra terram, quia caro de terra est. Et de carne Maria carnem suscepit. Et quia in ipsa carne hic ambulauit, & ipsam carnem nobis manducandam ad salutem dedit. Nemo autem illam carnem manducat nisi prius adorauerit. Inuentum quomodo adoretur tale scabellum pedum Domini: & non solum non peccemus adorando, sed peccemus non adorando. Ita Ambrosius in eundem versum psalmi illius, Scabellum terra intelligatur, per terram autem caro Christi, quam hodie quoque in mysteriis adoramus, quam

Et Apostoli in Domino Jesu adorarunt.
 Nazianzenus in epitaphio sororis suæ, τ
 ὅτι ἰουαννης ἐν πρῶτον αἰαχεδουμένῳ,
 hoc est, inuocabat Christum, qui in altari
 quando mysteria cœnæ celebrantur hono-
 ratur. Et sententia Eusebij Emisseni di-
 cit, cū reuerendum altare cibis spiritua-
 libus satiandus ascendis, sacrum Deitui
 corpus & sanguinem fide respice, honora,
 mirare, mente continge, cordis manu
 suscipe, & maximè toto haustu interioris
 hominis assume. Lutherus etiam contra
 Louanienses artic. 16. vocat Euchari-
 stiam Sacramentum venerabile & ado-
 rabile. Et in 47. cap. Gen. Nos non tan-
 tū orantes, sed & baptizantes, absol-
 uentes & absoluti, & accedentes ad sa-
 cram synaxim, quin ad recitationem
 promissionis & textus Euangelij genua
 flectere, vel saltem stare debemus in si-
 gnum adorationis, reuerentiæ & grati-

tudinis. Et si in cœna nihil aliud porrigeretur præter panem & vinum, sicut Sacramentarij blasphemant, tamen est ibi promissio & vox diuina, & Spiritus sanctus per Verbum in cœna, idcôque decebat nos cum reuerentia accedere. Quanto verò magis id fieri par est quando credimus adeste verum corpus & verum sanguinem cum Verbo? Hæc Lutherus. Christum igitur Deum & hominem in diuina & humana natura in actione cœnæ Dominicæ verè & substantialiter præsentem in spiritu & veritate adorandum nemo negat, nisi qui cum Sacramentariis vel negat vel dubitat de præsentia Christi in Cœna. Neque enim αἰνέσεις & annuntiatio mortis Christi in Cœna ritè fieri potest, sine adoratione illa quæ sit in spiritu & veritate.

Ie. ne pense pas que les Sacramentaires ou Prétendus Reformez de France,

qui ont receu le Formulaire de la Cene de Caluin & qui le pratiquent, reiettent le témoignage de Kemnice, que nous venons de rapporter mot à mot. A sçauoir, qu'il faut adorer le corps & le sang de Christ, s'ils sont reellement en l'Eucharistie. Encore qu'ils n'approuuent pas la creance des Lutheriens de la Realité par consubstantiation, non plus que la transubstantiation des Catholiques: Cela n'empescha pas toutefois la deliberation qu'ils prirent en leur Synode national, tenu à Charenton lés Paris l'an 1631. de receuoir à leur communion ceux de la Confession d'Ausbourg, c'est à dire les Lutheriens, s'ils y vouloient venir, sans renoncer à leur creance. Car presupposé que le corps & le sang de Iesus Christ soient presens en l'Eucharistie, ou comme les Lutheriens disent, ou comme les Catholiques l'entendent, ceux de la Religion Pretendue auouënt qu'il les faut adorer, mais ils nient qu'il les faille adorer en leur Cene, & ils ne le font point. Parce que selon leur creance, & selon leur For-

mulaire, leurs Sacremens ne sont que des signes, des elemens terriens & corruptibles, qu'on voit à l'œil & qu'on touche à la main, ausquels il ne se faut point amuser, & qu'il faut chercher ailleurs la verité. Et certes ils ont raison, comme nous auons dit, en vsant de la sorte. N'y ayant en leur Cene ni oblation à Dieu, ni benediction & consecration du pain & du vin, ce ne sont que des signes vains & friuoles. Le corps & le sang de Iesus Christ n'y sont pas. Tout ce qu'ils font n'est que fingerie & profaneté, qu'ils ont substitué au lieu de la Messe instituée & ordonnée par Iesus Christ, obseruée religieusement par les Apostres, recommandée à leurs successeurs, que l'Eglise celebre avec toute la reuerence & la deuotion qui luy est possible, en pratiquant les instructions & les commandemens de l'Apostre, l'examen & l'épreuue des communians, la confession des pechez, les prieres, la lecture des saintes Escritures, les exhortations, l'oblation à Dieu du pain & du vin, l'inuocation du saint

Esprit , la consecration , l'oblation à Dieu du corps & du sang de Iesus Christ, l'adoration , la communiõ , & les actions de graces. Ce que Caluina du tout abolien sa Cene , ayant écrit & proferé des blasphemés horribles & execrables contre la Messe , que nous ne repeterõs pas en ce lieu , renuoyant le Lecteur à ce que nous en auons dit cy-dessus , & au traité du Sacrifice de la Messe : il suffit de noter icy leur profaneté. Ils inuectiuent contre les Catholiques , & les outragent de ce qu'ils adorent le corps & le sang de Christ en la Messe. Et disent qu'ils y paillardent spirituellement , & que c'est vne idolatrie. Laissons les là au iugement de Dieu , qui vengera l'outrage que font les Heretiques à sa parole & à ses Sacrements. Ils abusent de la sainte Ecriture , dont ils renuersent le sens en beaucoup d'endroits par leurs fausses versions & interpretations. Ils attribuent le tres-saint nom de la Cene du Seigneur à leur chimere & à leurs inuentions , ayant entrepris d'abolir & d'aneantir sous pre-texte de reformer l'Eglise , le principal acte

acte de la Religion Chrestienne, la synaxe de l'Eglise, l'anchre du bastiment & la clef de la voûte, qui en fait l'assemblage, ordonnée par le maistre Architecte, comme parle Salomon. Ce qui l'vnit avec Iesus Christ, qui la reconcilie avec Dieu, qui vnit tous ses membres sur la terre, & qui l'vnit avec la triomphante qui est au Ciel. La triomphante assiste dans le Ciel à Iesus Christ, qui offre à Dieu son sacrifice, comme le grand le souuerain Pontife dedans le lieu tres-saint, representant sa mort, son corps rompu, & son sang répandu, tout frais, tout viuant, intercedant sans cesse pour nous. Et la militante offre & presente tous les iours çà bas en la terre le sacré saint memorial du grand sacrifice propitiatoire pour les pechez de tous les hommes. Ce corps & ce sang qu'elle adore. Ainsi que l'Apostre l'enseigne en l'Epistre aux Hebreux, qui est comme vne Liturgie du sacrifice de la Messe. Et nos Pretendus Reformez s'en seruent pour la combattre & pour la détruire s'ils pouuoient. Ils s'en sont pris à cinq

H

actes religieux observez en l'Eglise, leur rauissant le nom de Sacrement, à la Confirmation, à la Penitence, à l'Ordre, au Mariage, & à l'Extrême Onction qu'ils ont tout à fait supprimée. Ils ont laissé le nom de Sacrement à la sainte Cene du Seigneur. Mais ils en ont détruit la forme & les circonstances parmy eux. Ils la renient pour sacrifice de Iesus Christ. Ils l'ont dépouillée de tous les honneurs que l'Eglise luy rend, de la frequente celebration, du lieu respectueux, de la preparation, de l'examen par la confession & par la penitence. Ils l'ont tout à fait dénaturée en luy ostant l'Oblation, la Consécration, & l'Adoration, & l'ont reduite à vne miette de pain & à vne goutte de vin, qu'ils veulent faire passer sans aucune benediction au lieu & en la place du corps de Iesus Christ rompu, de son sang répandu. C'est ce qui a fait dire à Saumaïse vn de leurs grands sçauans & de leurs arc-boutans, qui s'est voulu mesler d'écrire contre la Transubstantiation pour contredire au liure postume du vertueux &

docte Grotius. Le sieur Claude Saumaize luttant contre les morts , après auoir rapporté plusieurs passages des Anciens, qui prouuent la Benediction & Consecration du S. Sacrement , nonobstant tout cela il dit que , *Vetus Ecclesia non credidit aliqua opus esse consecratione , qua panis existeret corpus Christi , aut vinum sanguis eiusmodi , sed fidem cuiusque sufficere ad id efficiendum.* C'est en la page 138. de son Epistre qui a tant seulement deux cens & six feuillets *in octauo*. Parce qu'il n'y a point de Consécration , point de Benediction tout à fait en la Cene Caluinienne , à laquelle il s'estoit attaché , la passion luy a fait dire que l'Eglise ancienne n'a point crû qu'il fust besoin de faire aucune consecration du pain & du vin pour estre le corps & le sang de Christ : mais que la foy de chaque communiant suffisoit à cela. Ne voilà-ce pas vn beau Religieux , bien entendu aux mysteres de la foy , qui se deuoit bien mesler d'en écrire. Toutefois s'estant obstiné à soustenir vne mauuaise cause, y estant engagé , il a esté contraint de tenir ce langage.

H ij

Au lieu de reconnoistre ce que nostre Seigneur a fait & a ordonné de faire à ses Apostres. Ce que les Apostres ont recommandé à l'Eglise, ce que l'Eglise a toujours religieusement observé, de benir & de consacrer le pain & le vin en la sainte Eucharistie, l'offrant à Dieu, invoquant son saint nom, implorant sa benediction, & prononçant les paroles de Iesus Christ, comme vn Arrest definitif accompagné de l'efficace & de la vertu du S. Esprit iusqu'à la fin du monde. Certes on leur peut bien iustement reprocher ce que le Seigneur disoit aux Juifs par le Prophete Ieremie chap. 2. Vous avez fait deux maux. Vous avez quitté Dieu & son Eglise, qui est la fontaine d'eau vive, pour vous creuser des puits, des puits tout pleins de fentes qui ne tiennent pas l'eau. Et au chapitre dix-huitième. *Qui a iamais ouï dire rien de pareil? Israël a fait vne chose enorme Saarurith. Quittera-t-on pour vn rocher qui est dedans vn champ la neige du Liban, abandonnera-t-on des eaux qui viennent de loïn, qui sont fresches & courantes? C'est vn passage excel-*

lent tres-mal traduit par ceux de Geneue, qui luy donnent vn sens tout à rebours, comme nous auons fait voir en nostre Commentaire sur le 24. chap. du liure de Iob. C'est ce qu'ont fait les Pretendus Reformez en renonçant à la Messe, ils ont quitté & abandonné la source d'eau viue, l'institution de Iesus Christ, les traditions des Apostres, la Liturgie & les actions de graces que l'Eglise a receu & pratiqué, & recommandé de pere en fils, ces eaux qui viennent de loin, fresches, & courantes, pour se creuser des puits tout pleins de fentes, où il n'y a point d'eau, & ils en vont chercher sur vn rocher tout sec. Car ie vous prie, quelle consolation y a-t-il à la Cene Caluinienne, qui n'est rien par sa propre confession, & selon son propre Formulaire, qu'un signe & qu'une figure sans verité, sans realité, laquelle il faut chercher ailleurs, ce dit-il, sans s'amuser à ces elemens terriens & corruptibles, visibles & palpables. Certes on peut bien dire que ce n'est pas là la Cene du Seigneur. Et toutefois ils donnent ce saint

& venerable nom à leur profaneté. Ainsi les heresies prennent-elles le nom de parole de Dieu. Ochin & Socin ont tissé leurs Catechismes tout de passages de la sainte Ecriture, qu'ils peruertissent pour abuser, pour seduire, & pour ébrâler ceux qui ne se tiennent pas fermes sur le bon fondement de la doctrine Catholique. Laissons là donc les noms, parlons de la chose, examinons les doctrines & les esprits s'ils sont de Dieu. Abraham, Isaac, & Jacob sont noms de Patriarches. Pierre, Jean, Jacques, & Paul des noms de grands Apostres. Mais combien de personnes ont pris, ont eu ces noms de Patriarches & d'Apostres, qui n'ont point eu la foy, ni les mœurs de ces saints personnages? Iuda estoit le principal des douze Patriarches, duquel Silo le Messie, le Christ est descendu. Le Sceptre ne sera point osté de Iuda, ni le Législateur d'entre ses pieds, que Silo ne vienne, ou ne soit venu. Et toutefois celuy qui trahit Iesus Christ auoit ce nom là, & le profana. Ne vous amusez pas aux noms, aux mots, Parasite masqué, qui que vous

soyez, prenez-vous à la chose. Laissez là les titres de Cene & de Messe. Examinez bien la doctrine contenuë au traité du Sacrifice de la Messe. Faites en vôtre profit, & de cette réponse que nous faisons à vos railleries sur le mot de Messe, pour seruir à vostre salut, & au salut de ceux qui ont esté trompez & débauchez, ou par vne mauuaise education, ou par seduction, & que vous taschez d'entretenir dans leur erreur. Rentrez dans le bercail de l'Eglise, & taschez d'y ramener les brebis égarées. Et vous rangez sous la houlette du souuerain Pasteur nostre Seigneur Iesus Christ. Auquel avec le Pere & le S. Esprit soit honneur & gloire à iamais.

A M E N.

Fautes de l'Impression.

En la page 35. l. 15. mettez afin au lieu de ainssi.

Pag. 41. l. 10. lisez exprés au lieu d'expers.

Pag. 53. l. 18. lisez Parquoy.

Pag. 73. lisez sanctifier.



